

Phaodaiq

Gevq-a nail gaq

Haoqgavq niil keiv nail lavqkhoel bhai liq pov bhee dai, “Yaolhaq ngaol” dai, gevgq-ai thaq nail ngaol. Milnee uqnee khe Khali yaq juq iqsanl, Gaqkhoel Yaolhaq-i mail gevgq-a nail dai, noeq nail ngaol.

Gevq-a nail aqyanq khi mail aqduq

Gevq-a nail aqyanq neq, A.D. 95-96 kovq nail gaiqlaq bhai ngaol. Gevgq-a nail aqduq neq, Bhaqmol dai khul nail eeljaollaol-n bhai gevgq-a nail ngaol. Lolmav heeqphaq Doqmilti heeqphaq jiovgq khi uvthaiq thailthaiq nail kov-uvq bhai Khali yaq juq khoeq nail jiovgq nail bhai ya daq deedee-a nail ngaol. Heeqphaq Doqmilti-i mail Yaolhaq bhai, Bhaqmol eeljaollaol-n bhai bhi the ha khi jaol-u phao, Yeiqsul-i mail phaodaiq bhiq-a nail pha q ya moel-a nail khe-ai, gevgq-a nail ngaol.

Khaq sil gaq bhai gevgq bhiq-a nail

Haoqgavq niil keiv neq, Aqsil-aq milkhaoq bhai jaol nail Khali yaq munl sivq munl bhai taivq-ail maq ngel nail, milkhaoq doi dai jaol khi khoeq nail jiovgq nail pha q bhai ya daq nail Khali yaq juq bhai iqsanl, gevgq bhiq-a nail ngaol.

Khul bhai noeqthunq khi gevgq-a nail

Haoqgavq niil keiv, Khali yaq juq nail haqbhoil khanq sil khi gaoq doevq kovq lal-a nail

Heeqphaq Yeiqsul neq, bhaqaoq khi seiqleiq
 khaoqsail eeq nail lavqkhoel teevq pov gaog
 yavq kha lee khi miltsaq bhai uvthaiq lee nail
 ngaol. Alheel ngel-i mail, Miqyail nail yaq juq
 Khali bhai genl del nail gaq bhai uqhuq maq
 thaog mail, neema ivq khi, aqmeeq aqhaol haol
 dai doevq yaoq dai, gaq mailma-ail bivq-a nail
 ngaol. Al ovqtavq, Miqyail Khali yaq munl nail
 haqbhoil khul lainq-ai thaq nail dai, yaqhao kev
 lee nail pha q Miqyail-i mail phaodaiq bhiq-a nail
 pha q gevq-ai tha q nail ngaol.

Neivq heeqphaq neq, Miqyail nail ganl bhai lav
 tsoiq khi, Khali yaq juq bhai khoeq bhiq jiovg
 bhiq khi ngaol-aog, Miqyail Khali yaq juq bhai
 hevqkovq khi, neivq heeqphaq khi mail aivq nail
 munl juq bhai neq, yalkhaq dal nail aqn kev lee
 thailthaiq nail ngaol dai, bhi heeq nia dai iqsanl,
 gevq-a nail ngaol.

Iqmoeq ilmoeq khe daoq

¹ Miqyail-i mail Yeiqsul Khali bhai phaodaiq
 bhiq-a nail, Yeiqsul aivq nail ganl juq haoqgavq
 niil keiv nail lavqkhoel bhai gevq-ai tha q nail
 ngaol. Mao-ail maq mao lal mail, pevq lal nail
 ganl juq aivq nail yaqkav juq bhai bhi heeq bhi
 moel nail dai khi, Yeiqsul Yaolhaq bhai alhai
 phaodaiq bhiq-a nail ngaol. Ngal neq, Miqyail
 nail yaqkav Yaolhaq ngaol. Yeiqsul aivq nail
 nqtavq gaqkhoel bhai khoel-ai leevq khi, ngaq
 bhai ganl niil juq bhi heeq bhi moel lavq-a nail
 ngaol. ² Miqyail nail daoq khi Yeiqsul Khali-i mail
 salkhil khanq-ai tha q nail ganl juq bhai, ngal

ya moel-a nail khe-ai, salkhil khanq khi gevq-ai thaq nail ngaol. ³ Miqyail nail daoq niil ge daiq bhiq nail juq maqkhaiq, gevq-ai thaq nail daoq juq bhai ya gaiq khi naldaiq nail juq maqkhaiq, geeqlaoq eeq nail ngaol. Khul mail dai ngal-aq neq, khal gevq-ai thaq nail ganl iqsanl, pevq lal nail yanq kev lee-aiq nail ngaol.

Khali yaq munl sivq munl bhai gevq bhiq-a nail ganl

⁴ Ngaq neq, Yaolhaq ngaol. Aqsil-aq milkhaoq bhai jaol nail Khali yaq munl sivq munl bhai haoqgavq niil gevq bhoel-ai lavq-a nail ngaol. Milnee uqnee iqsanl, niil aq-il iqsanl, doevq khi yaqhao iqsanl, yavq kha lee nail geeqlaoq eeljaol khi neesal-ovq nail pha q maqkhaiq, aivq nail doiqbev bev ma nail sivtavq bhai jaol nail aqhaqlal sivq gaq nail geeqlaoq eeljaol khi neesal-ovq nail pha q, nuljuq nail kovtavq bhai jiav dei-eiq. ⁵ Saljial ivq nail lavqkhoel nee salkhil khanq nail Yeiqsul Khali nail geeqlaoq eeljaol khi neesal-ovq nail pha q maqkhaiq, nuljuq nail kovtavq bhai jiav dei-eiq. Yeiqsul Khali neq, sil-a nail tsaol-aq nail lavqkhoel bhai iqmoeq ilmoeq doevq kovq lal-a nail gaq pevq nail ngaol. Miltsaq juq khe heeqphaq bhai uvthaiq nail gaq iqsanl pevq nail ngaol. Aivq ngadao bhai gaiq-a nail ngel-i mail, aivq nail aqsivq-i mail, ngadao nail oeqbal phaiq lavq-a nail ngaol. ⁶ Ngadao aivq nail milkhaoq lavqkhoel bhai heeqphaq pevq lal dai maqkhaiq, aivq nail Aqbhu Miqyail nail Philma jio vq dai maqkhaiq, aivq nl lavq-a nail ngaol. Nqmaq

maqluv halyeel aivq nail kovtavq bhai seiqleiq
khaoqsail khi uvthaiq nail bhaqaoq jiav dei-eiq.
Aqmiq.

⁷ Heldaiq dei-eiq,
aivq nqdil lavqkhoel nee
yavq kha lee nail ngaol.
Maivneev yaoq neev
yaoq-ao nee khi
aivq bhai geeqkhaoq-i mail
coev-a nail juq,
aivq bhai ya moel nail ngaol.
Miltsaq kovtavq bhai
jaol nail jeq-e jaq-a
iqsanl mail,
aivq bhaqda nee
nioilkhaoq ya khaoq nail ngaol.
Niailhai pevq lal nail ngaol.
Aqmiq.

⁸ “Ngal neq, Aqlaqphal khi Aolmeiqgal* ngaol.
Iqmoeq khi haoqnao naosaq gaq ngaol” dai,
iqsanl nail kovtavq bhai uvthaiq nail bhaqaoq
eeq nail Heeqphaq Miqyail ge nail ngaol. Aivq
neq, milnee uqnee, niil aq-il iqsanl doevq khi
yaqhao iqsanl, yavq kha lee nail gaq ngaol.

*Aqhaqlal lavqkhoel nee Yeiqsul bhai ya moel-a
nail ganl*

⁹ Ngal neq, nuljuq nail aqivq jaqbheq Yaol-
haq ngaol. Khoeq nail pha q bhai maqkhaiq,

* **1:8** 1.8 Aqlaqphal khi Aolmeiqgal neq, Heiqlaqsal nail hao-
qgavq iqmoeq khe maol khi haoqnao naosaq khe maol ngaol.
Miqyail neq, nqmaq maqluv halyeel doevq nail ngaol dai, ge
movq nail ngaol.

Miqyail Milkhaoq bhai maqkhaiq, ol nail pha q bhai maqkhaiq, Yeiqsul nail lavqkhoel ngal nuljuq nee mail daq thailthaiq nail ngaol. Ngal Miqyail nail daoq cavq cavq-ail, Yeiqsul nail ganl salkhil khanq nail bhaqda nee, Bhaqmol dai khul nail eeljaollaol-n bhai bhi nieil-aivq-a nail ngaol. ¹⁰ Heeqphaq Miqyail nail aqn n-gaol†, ngal Aqhaqlal Miqyail lavqkhoel bhai jaolu phao, nqbho nail aqthel meel dov-ai leevq nail khe-ai, ngaq nail haoqnao phao kav deede nee nail aqthel bhai ngal ya gaiq-a nail ngaol. ¹¹ “Naoq-i mail ya moel-a nail juq, haoqgavq lavqkhoel bhai ge vq bhoel khi, Eilpheilsu meenq, Saqmullaqnav meenq, Bheiqlaqgaq meenq, Thilyathilla meenq, Saqdil meenq, Phillaqdeiqphil meenq, Laoqdiq-civ meenq, meenq juq bhai jaol nail Khali yaq munl sivq munl bhai oil bhoel gai-aivq bhiq yaoq” dai, aqthel al ge lavq-a nail ngaol.

¹² Ngaq bhai daoq ge tsaolq lavq-a nail gaq bhai ya moel dai, ngal haoqnaol naolkovq kovq daiqu phao, heel nail phalmanq sivq heeq bhai ya moel-a nail ngaol. ¹³ Phalmanq al juq nail gaoltsi bhai, Tsaol-aq nail Yaqyov khe-ai dul nail tsaol-aq teevq gaq bhai ngal ya moel-a nail ngaol. Tsaol-aq al gaq, cilmeiv phuqlul bhai kev dai phailkhaq heelma doi khi, aivq nail neema bhai heel nail jiovpavq pavq-ai thaq nail ngaol. ¹⁴ Aivq nail uqhuq khi aivq nail tsailkheel neq, phulleq deel yaol nail aqmevq khi niail khe-ai phul deede nee nail ngaol. Aivq nail maivneev neq,

† **1:10** 1.10 Heeqphaq Miqyail nail aqn n-gaol dai ge nail neq, jaol n n-gaol bhai ge movq nail ngaol.

miqjaq miqlail khe-ai dul nail ngaol. ¹⁵ Aivq nail aqkheil neq, poiv haol-ai thaq nail giqheel khe-ai dul nail ngaol. Aivq daoq ge nail neq, aqthel mao-ail meel nail laoljaol nail aqthel khe-ai dul nail ngaol. ¹⁶ Aivq nail lavqmal lavq bhai aqgil sivq heeq nieivq thaiq-ai thaq nail ngaol. Aivq nail moeqthaoq lavqkhoel nee, nvq phao nvq phao-ail, tav deede nail thaoma teevq keiv dov lee-a nail ngaol. Aivq nail maivphaoq neq, nlma khe-ai nl jeel coev nail ngaol.

¹⁷ Ngal aivq bhai ya moel-u phao, sil thaq nail tsaol-aq khe-ai aivq nail aqkheil daoqthaoq bhai ga tsuq ail-a nail ngaol. Aq-u phao, aivq nail lavqmal lavq ngaq nail kovtavq bhai bavq dav khi ge lavq-a nail: “Thaq geesil. Ngal neq, iqmoeq khi, haoqnao naosaq khe gaq ngaol. ¹⁸ Doevq thailthaiq nail gaq iqsanl ngel nail ngaol. Ngal sil khi ngaol-aog, niil aq-il nqmaq maqluv halyeel doevq thailthaiq nail ngaol. Sil nail pha q nail taovq taovqphoil khi sil nail milkhaoq nail taovq taovqphoil ngaq nail aqlavq lavqkhoel bhai aol nail ngaol.

¹⁹ Alheel ngel-i mail, moel-a nail juq maqkhaiq, niil aq-il pevq thailthaiq nail juq maqkhaiq, yaqhao pevq lal nail juq maqkhaiq, gevq tha q-ai yaoq. ²⁰ Ngaq nail lavqmal lavq bhai naoq-i mail ya moel-a nail aqgil sivq heeq nail daoqceevq khi, heel phalmanq sivq manq nail daoqceevq neq, niailhai ngaol. Aqgil sivq heeq neq, Khali yaq munl sivq munl nail nqtavq gaqkhoel ngaol. Phalmanq sivq heeq neq, Khali yaq munl sivq munl ngaol” dai, ge lavq-a nail ngaol.

2

Eilpheilsu Khali yaq munl bhai bivq-a nail daoq

¹ Yeiqsul gaoq ge nail: “Eilpheilsu meenq bhai jaol nail Khali yaq munl nail gaqkhoel bhai niailhai gevg bhiq yaoq:

Lavqmal lavq bhai aqgil sivq heeq nieivq thaiq-ai thaq khi, heel phalmanq sivq heeq nail gaoltsi bhai tsao thailthaiq nail gaq, niailhai ge nail ngaol:

² ‘Naol nl thail hal thailthaiq nail juq bhai maqkhaiq, nl doil hal doil-a nail juq bhai maqkhaiq, oltsaol nail phaqq bhai maqkhaiq, ngal heeq kivq naol. Naol haqeviv nail tsaol-aq juq bhai maq khanq tsaol nail bhai iqsanl, ngal heeq kivq naol. Gaqkhoel ngaol dai, ge khi ngaol-aqq, maldil maq ngel nail juq bhai, naol laonqdaiq khi, aqyu juq goiqbhaoq bhaoq nail tsaol-aq ngel lao thaqq-il dai, naol ya heeq kivq-a nail ngaol.

³ Naol oltsaol khi ngaqq bhai juq nail bhaqda nee khoeqq nail jiovg nail bhai ya daqq-u phao, naol neema maq cov nail bhai iqsanl, ngal heeq kivq nail ngaol.

⁴ Thailhai ngaol-aqq, ngal naoqq bhai oeqbal thaqq duqq niailhai jiav nail ngaol. Naol iqmoeq-u goil nail gaiqq-a nail neema aol khi ngaol-aqq, niil aqq-il maq aol-aqq thaqq nail ngaol. ⁵ Alheel ngel-i nail, naol khadai ga kha lee-a nail bhai saol-nvqq khi, oeqbal noeq pov noeq pov-ail, iqmoeq-u nl-a nail khe-ai, nl yaoqq. Naol naoqq nail oeqbal maqq noeq pov haqq neqq, ngal naoqq nail phalmanqq bhai tsiqq dov lee naol. ⁶ Thailhai ngaol-aqq, naol aqqmeeqq niil phaqq nl thailthaiqq-ai haqq nail

ngaol: Naol Nilgaolla tsaol-aq* nl nail hal nail bhai neejiaiv jiaiv nail ngaol. Ngal iqsanl al juq bhai neejiaiv jiaiv nail ngaol.

⁷ Naqkhaol khal covq nail tsaol-aq, Aqhaqlal Miqyail Khali yaq munl juq bhai ge bhiq nail daoq aqmeeq-ail naldaiq yaoq. Gaq lai nail tsaol-aq bhai neq, aqdoevq bhi doevq nail aqbhaol nail aqheeq, ngal aqyu juq bhai bhi jaq naol. Aqbhaol al bhaol neq, Miqyail nail Bhaqlaqdilsuv dai khul nail gaoqkhail lavqkhoel bhai doevq nail ngaol'” dai, ge bhiq-a nail ngaol.

Saqmullaqnav Khali yaq munl bhai bivq-a nail daoq

⁸ Yeiqsul gaoq ge nail: “Saqmullaqnav meeng bhai jaol nail Khali yaq munl nail gaqkhoel bhai niailhai gevq bhiq yaoq:

Iqmoeq ilmoeq khe gaq pevq khi, haoqnao naosaq khe gaq pevq nail nee ovqtavq, sil khi ngaol-aoq, gaoq doevq kovq lal-a nail gaq, niailhai ge nail ngaol:

⁹ ‘Naol ya daq thailthaiq nail khoeq nail jiovg nail phaqq khi haq nail aoq nail bhai, ngal heeq kivq naol. (Maldil dai, ge haq neq, naol neq hulmeeq hulbhao ngaol.) Tsaol-aq teevq pav ganav juq naoq bhai khal ge movq-ail ge doil nail bhai iqsanl, ngal heeq kivq naol. Aqyu juq neq, Yuldav nail tsaol-aq ngaol dai, ge khi ngaol-aoq, maldil Yuldav nail tsaol-aq maq ngel-ail. Neivq Saqdaq nail munl lavqkhoel bhai aol nail tsaol-aq ngaol. ¹⁰ Maq maqq lal mail, naol ya daq nail

* **2:6** 2.6 Nilgaolla tsaol-aq neq, maq tsaq nail phaqq bhai cavq nail cov nail tsaol-aq juq ngaol.

khoeq nail jiovq nail pha q bhai tha q geesil. Naoq bhai laonq daiq nail dai khi, neivq heeqphaq nuljuq teevq pav ganav juq bhai thaonq bhai laol khi, tsel n bhee dai khoeq nail jiovq nail bhai, nuljuq ya daq nail ngaol. Sil-u kev dai, neema ivq yaoq. Ivq haq neq, aqdoevq bhi doevq nail heel uqtsaoq kovpavq, ngal nuljuq bhai bivq naol.

¹¹ Naqkhaol khal covq nail tsaol-aq, Aqhaqlal Miqyail Khali yaq munl juq bhai ge bhiq-a nail daoq aqmeeq-ai nal daiq yaoq. Nvq pov teevq pov sil nail pha q neq, gaq lai-a nail tsaol-aq bhai, khul teevq pha q-ail maq khi nia-ail'” dai, ge bhiq-a nail ngaol.

Bheiq laq gaq Khali yaq munl bhai bivq-a nail daoq

¹² Yeiqsul gaoq ge nail: “Bheiq laq gaq meenq bhai jaol nail Khali yaq munl nail gaqkhoel bhai niailhai gevq bhiq yaoq:

Nvq phao nvq phao-ail tav deede nail thaoma jia v nail niil gaq niailhai ge nail ngaol:

¹³ ‘Naol kha q bhai jaol nail dai, ngal heeq kivq naol. Neivq Saqdaq nail joiqjaq doiqbev jia v nail bhai naol jaol nail ngaol. Thailhai ngaol-aq, naol ngaq bhai saljial ivq nail ngaol. Saljial ivq nail ngaq nail ganl salkhil kha nq nail gaq pevq nail Aqdilpav bhai, neivq Saqdaq jaol nail naoq nail meenq nee heivq khi ngaol-aq, ngaq bhai neema tha qtsaol nail pha q bhai naol maq khaonq ha-al.

¹⁴ Thailhai ngaol-aq, ngal naoq bhai oeqbal tha q duq niailhai jia v nail ngaol. Naoq nail jaol duq bhai jaol nail tsaol-aq teevq pav ganav

juq neq, Bhaqlaq dai mil-ai thaq nail gaq-i mail cavq nail cov nail haoqnao tsaothe thailthaiq nail ngaol. Ilsaqlaiqlal nail tsaol-aq lai-q-ail tsa-ail dai, Bhaqlaq neq, Bhaqlail bhai cavq bhiq cov bhiq-a nail ngaol. Cavq bhiq cov bhiq-a nail al neq, thaoqphaoq aqma maolkhoel bhai laol bhiq-a nail jaqjaq daoldaol jaq yaoq dai, cavq bhiq cov bhiq-a nail nee ovqtavq, khaqmiq iqsanl sev yaoq dai, cavq bhiq cov bhiq-a nail ngaol. ¹⁵ Alhai dul dai, naoq nail lavqkhoel khe tsaol-aq teevq pav ganav juq neq, Nilgaolla tsaol-aq juq-i mail cavq bhiq cov bhiq nail haoqnao tsaothe thailthaiq nail ngaol. ¹⁶ Alheel ngel-i mail, oeqbal noeq pov yaoq. Maq noeq pov haq neq, ngal naol jaol nail bha lavqtsail mail yavq kha lee khi, ngaq nail moeqthaoq lavqkhoel nee dov lee nail thaoma-i mail tsaol-aq al juq bhai genl dev naol.

¹⁷ Naqkhaol khal covq nail tsaol-aq, Aqhaqlal Miqyail Khali munl juq bhai ge bhiq-a nail daoq bhai aqmeeq-ai naldaiq yaoq. Gaq lai-a nail tsaol-aq bhai neq, oil-uvq-ai thaq nail maqnav khaqmul khi mail lovmav aqphul teevq heeq ngal bivq naol. Lovmav aqphul al heeq bhai aqmil aqsivq gevq-ai thaq nail ngaol, lovmav al heeq bhai ya-a nail gaq maq ngel haq neq, aqmil al mil bhai teevq gaq-ail maq heeq nia-ail' ” dai, ge bhiq-a nail ngaol.

Thilyathilla Khali yaq munl bhai bivq-a nail daoq

¹⁸ Yeiqsul gaoq ge nail: “Thilyathilla meenq bhai jaol nail Khali yaq munl nail gaqkhoel bhai nialhai gevq bhiq yaoq:

‘Miqyail nail Yaqyov nail maivneev neq, miq-jaq miqlail khe-ai dul khi, aivq nail aqkheil neq, poiv haol-ai thaq nail giqheel khe-ai dul nail ngaol. Aivq niailhai ge nail ngaol:

¹⁹ Naol nl thail hal thailthaiq nail juq bhai maqkhaiq, goil nail gaiq-a nail phaqaol nail bhai maqkhaiq, neema thaqtsaol nail phaqaol nail bhai maqkhaiq, yu bhai tsaojao-ai nia nail bhai maqkhaiq, oltsaol nail bhai maqkhaiq, ngal heeq kivq naol. Al ovqtavq, niil aq-il naol nl thail hal thailthaiq nail phaqaol neq, aq-u nl-a hal-a nail nee maqtsil mao jaiq nail bhai iqsanl, ngal heeq kivq naol.

²⁰ Thailhai ngaol-aog, ngal naoq bhai niailhai oeqbal thaqaol duq jiaq nail ngaol: Yovqgavq bhai yovqgavq Miqyail nail haqbbhoil gedan nail tsaol-aq ngaol dai, ge nail Yeiqsaqbheiqal dai khul nail yaqmai-aq al gaq bhai naol khul teevq phaqaol iqsanl maq nl bhiq dai, alhai phaiq ha-ai thaqaol nail ngaol. Aivq cavq nail cov nail al neq, ngaq nail yaqkav juq maq tsaq maq daol nail lavqkxoel khaqmiq sev khi, thaoqphaoq aqma maolkhoel bhai laol bhiq-a nail jaqjaq daoldaol jaq yaoq daol yaoq dai iqsanl, hevq bheeq-a nail ngaol. ²¹ Naol oeqbal noeq pov yaoq dai, ngal aivq bhai yanq bivq khi ngaol-aog, aivq khaqmiq sev thailthaiq nail al bhai maq noeq pov-ail. ²² Heldaqaol dei-eiq, ngal aivq bhai nal nail goel nail jaol duq bhai bavq bhoel naol. Yeiqsaqbheiqal nee mail khaqmiq sev thailthaiq nail tsaol-aq, aivq nl nail khe-ai nl nail phaqaol bhai maq noeq pov haqaol neq, ngal aqyu juq bhai iqsanl, kav deede neq nail kxoel nail jiovaq nail

lavqkhoel bhai bavq bhoel naol. ²³ Ngal yaqmai-aq al gaq nail yaq juq bhai lav heivq naol. Ngal neq, neema khi mail neenoeq needul bhai tseldaiq nail gaq ngel lao thaq nial dai, Khali yaq munl iqsanl mail ya heeq nia naol. Nuljuq-i mail nl-a hal-a nail juq bhai geel-nvq dai, ngal nuljuq bhai teevq gaq khai-aq teevq gaq bhai bivq naol. ²⁴ Thailhai ngaol-aog, neivq Saqdaq-i mail oil-uvq-ai thaq nail daoqceevq navq deede nail dai, yu ge nail juq bhai maq heeq nia dai, cavq bhiq cov bhiq-a nail al pha q bhai maq naldaiq dai, Thilyathilla meenq bhai jaol nail yaoq juq yaoq bhai ngal niailhai ge bhiq naol: Ngal nuljuq bhai yalkav yaoq kav yaoq, maq tsiq phi. ²⁵ Ngal yavq kha lee-u kev dai, nuljuq jia v nail pha q bhai, ivqdao dai nieivq thaiq-ai tha q yaoq.

²⁶ Daoq loi loi lai-u kev dai, ngaq nail ganl nl khi gaq lai-a nail tsaol-aq juq bhai, jeq-e jaq-a iqsanl nail kovtavq bhai uvthaiq nail bhaqaoq, ngal bivq naol. ²⁷ Ngaq nail Aqbhu ngaq bhai bhaqaoq bivq lavq-a nail khe-ai, jeq-e jaq-a iqsanl bhai hail nail joiqniovq-i mail aqyu juq uvthaiq khi meldel bhai deeq pav nail khe-ai, deeq pav bhiq nail ngaol. ²⁸ Ngal tsaol-aq al juq bhai, nqhao khe aqbhaq bhaq deede nail aqgil teevq heeq bivq naol. ²⁹ Naqkhaol khal covq nail tsaol-aq, Aqhaqlal Miqyail Khali yaq munl juq bhai ge bhiq-a nail daoq bhai aqmeeq-ai naldaiq yaoq'” dai, ge bhiq-a nail ngaol.

3

Saqdil Khali yaq munl bhai bivq-a nail daoq

¹ Yeiqsul gaoq ge nail: “Saqdil meenq bhai jaol nail Khail yaq muni nail gaqkhoel bhai niailhai ge bhiq yaoq:

Miqyail nail aqhaqlal sivq gaq jaol khi, aqgil sivq heeq nieivq thaiq-ai thaq nail gaq, niailhai ge nail ngaol:

‘Naoq-i mail ni nail hal nail juq bhai ngal heeq kivq naol. Naol aqdoevq doevq nail ngaol dai, yu ge khi ngaol-aoq, naol sil-aoq nail ngaol. ² Noeq lal yaoq. Naoq nail lavqkhoel bhai khal jail nail aqmeeq pha q maq bhi sil ceiv dai, gaq bivq yaoq. Khul khi mail dai ngal-aq, naoq-i mail ni-a hal-a nail pha q neq, ngaq nail Miqyail nail sivatvq bhai maq bhee maq lovq-ai haq-al dai, ngal heldaiq moel-a nail ngaol. ³ Alheel ngel-i mail, naoq-i mail ya gaiq khi ya hav bhoel-a nail daoq juq bhai, tha q nioilpeivq dei-eiq. Al juq bhai nal daiq khi oeqbal noeq pov yaoq. Naol aqgeel geel dai maq jaol haq neq, khoiqbhaoq bhaoq lee nail khe-ai, ngal lee naol. Ngali khul yanq bhai kev lee nail dai, naol maq heeq niaail.

⁴ Thailhai ngaol-aoq, yovqgavq nail aqgaq aqdoi bhai aqjiivq aqcavq maq lav cavq nail tsaol-aq teevq pav ganav juq, Saqdil meenq bhai jaol-ai haq nail ngaol. Aqyu juq neq, geel-nvq nail ngel-i mail, aqgaq aqdoi aqphul doi khi, ngaq-ai nee ya tsao nail ngaol. ⁵ Gaq lai-a nail tsaol-aq, alheel nail aqgaq aqdoi aqphul ya doi nail ngaol. Aqdoevq bhiq doevq nail haogqavq phaldoiq lavqkhoel ngal aqyu juq nail aqmil bhai maq siv peiv-aail. Ngaq nail Aqbhu nail sivatvq bhai maqkhaiq, aivq nail nqtavq gaqkhoel nail

sivtavq bhai maqkhaiq, thoil gaq ngaq nail tsaol-aq ngaol dai, ngal ge dov naol. ⁶ Naqkhaol khal covq nail tsaol-aq, Aqhaqlal Miqyail Khali yaq munl juq bhai ge bhiq nail daoq bhai, aqmeeq-ai naldaiq yaoq' " dai, ge bhiq-a nail ngaol.

Phillaqdeiqphil Khali yaq munl bhai bivq-a nail daoq

⁷ Yeiqsul gaoq ge nail: "Phillaqdeiqphil meengq bhai jaol nil Khali yaq munl nail gaqkhoel bhai niailhai gevq bhiq yaoq:

'Daqbhil nail ilkhaol khe taovq taovqphoil nieivq thaiq-ai thaq nail gaq neq, meeq nail haol nail tsaq nail gaq ngaol. Aivq-i mail phao-ai thaq haq neq, teevq gaq-ail, maq pheeqthaiq nia-ail. Aivq-i mail pheeqthaiq haq neq, teevq gaq-ail maq phao nia-ail. Aivq niailhai ge nail ngaol:

⁸ Naoq-i mail nl nail hal nail juq bhai ngal heeq kivq naol. Heldaiq. Tsaol-aq teevq gaq-ail maq pheeqthaiq nia nail lolgov teevq gov ngal naoq nail sivtavq bhai phao-ai thaq nail ngaol. Naol gaq micil taivq-ail aol khi ngaol-aq, naol ngaq nail daoq naldaiq nail nee ovqtavq, ngaq nail aqmil bhai maq khaonq ha-al. ⁹ Neivq Saqdaq nail munl lavqkhoel bhai aol nail tsaol-aq juq, ngal naoq nail aqlavq lavqkhoel bhai av bhiq naol. Nvjuq neq, Yuldav nail tsaol-aq ngaol dai, aqyu juq ge khi ngaol-aq, yuldav tsaol-aq maq ngel-ail. Aqyu juq goiqbhaq bhaq nail ngaol. Ngal aqyu juq bhai naoq nail aqkhill daoqthaoq bhai uqhuq bhi thaoq naol. Aq-u phao, ngal naoq bhai gaiq-a ail nial dai, aqyu juq heeq nial lal nail ngaol. ¹⁰ Ol ol-ail jaol yaoq dai, ngaq-i

mail naoq bhai ge bhiq-a nail daoq bhai naldaiq nail ngel-i mail, miltsaq yaq bhai laonqdaiq nail dai, miltsaq kovtavq bhai yaoq dao yaoq-aο nee laonq nail aqyanq kev lee-u phao, ngal naoq bhai bhi jel-ail naol.

¹¹ Ngal lavqtsail mail yavq kha lee naol dei-eiq. Naoq-i mail yaqhao khe ya nail heel uqtsaoq bhai teevq gaq-ail maq ya luv dov dai, naol khal jaol khal jiav nail yaoq pha q yaoq-aο nee bhai, ivqdao dai nieivq thaiq-ai tha q yaoq. ¹² Gaq lai-a nail tsaol-aq, ngaq nail Miqyail nail uqhuq thaοq nail ilkhaol il ma nail lavqkhoel khe ilkhel pevq lal dai, ngal nl naol. Aqyu juq kha q mao iqsanl a bhai jaol nail ngaol. Aqyu juq nail kovtavq bhai ngaq nail Miqyail nail aqmil, ngaq nail Miqyail nail meenq nail aqmil khi, ngaq nail aqmil aqsivq, ngal gevq-ai tha q nail ngaol. Miqyail nail meenq al meenq neq, ngaq nail Miqyail jaol nail nqtavq nee yavq kha lee-a nail Yeiqlulsaqlaiq meenq aqsivq ngaol. ¹³ Naqkhaol khal covq nail tsaol-aq, Aqhaqlal Miqyail Khali ya q munl juq bhai ge bhiq nail daoq bhai, aqmeeq-ai naldaiq yaoq'” dai, ge bhiq-a nail ngaol.

Laoqdiqciv Khali ya q munl bhai bivq-a nail daoq

¹⁴ Yeiqsul gaο q ge nail: “Laoqdiqciv meenq bhai jaol nail Khali ya q munl nail gaqkhoel bhai niailhai gevq bhiq yaoq:

Saljial ivq khi tsa q nail pha q aol nail lavqkhoel salkhil khanq nail ga q pevq nail, Miqyail-i mail teivq-ai tha q nail yaoq pha q yaoq-aο nee nail

kovtavq bhai uvthaiq nail, 'Aqmiq' dai, khul nail gaq niailhai ge nail ngaol.

¹⁵ 'Naoq-i mail nl nail hal nail pha q bhai ngal heeq kivq naol. Naol neq, aqcoevq iqsanl maq ngel, aqlaol iqsanl maq ngel. Naol aqcoevq maq ngel haq neq, aqlaol pevq nail bhai ngal oil movq-ail nial. ¹⁶ Thailhai ngaol-aq, aqlaol iqsanl maq ngel, aqcoevq iqsanl naq ngel dai, aqloil loil dai taivq-ail pevq nail ngel-i mail, ngal naoq bhai peivq ha naol. ¹⁷ Naol neq, yovqgavq bhai yovqgavq, Ngal neq, hulmeeq hulbhao ngaol. Nlmaoq yalkav maodai halpov jil-ai tha q naol. Ngal khul teevq pha q iqsanl maq loq yaoq-aol dai, ge khi ngaol-aq, naol khadai haq aq nl heeq pha q-ail jia v nail bhai maqkhaiq, khadai gaoqhaq lal heeq pha q-ail pevq nail bhai maqkhaiq, kha q dai haq nail bhai maqkhaiq, naol maq heeq nia-ail. Naol maivpeivq peivq nail nee ovqtavq, naoq nail aqmaol neq, maoldeq lavqnel dai jaol nail bhai iqsanl, naol maq heeq nia-il laq. ¹⁸ Alheel ngel-i mail, ngal naoq bhai niailhai tsiqtsoe lavq bhel. Naol hulmeeq hulbhao bhao lal dai, poiv haol-ai tha q nail heel ngal jaol nail bha ul lal yaoq. Naol maoldeq lavqnel-ail jaol nail bhai yu maq ya moel dai, naol maq ya haqsil nail khe-ai, aqgaq aqdoi aqphul ul doi lal yaoq. Naol maivneev moel lal dai, maivneev moel lal nail jagaq ul lal yaoq.

¹⁹ Ngal khal gaiq-a nail tsaol-aq bhai, ngal kha q kha q-ail khi aqmeeq-ai cavq bhiq cov bhiq nail ngaol. Alheel ngel-i mail, oeqbal noe q pov nail lavqkhoel nee laijai dal laivq yaoq.

²⁰ Heldaig dei-eiq, ngal lolgov bhai thulphaol khi kov thailthaiq nail ngaol. Ngaq nail daoq gaiq khi lolgov phao lavq nail khul gaq bhai maqkhaiq, ngal aivq jaol nail bha aol lai khi, aivq nee mail jaq tavq daol tavq nail ngaol. Aivq iqsanl, ngaq-ai nee jaq tavq daol tavq nail ngaol.

²¹ Ngal neq, gaq lai-a nail gaq pevq khi, ngaq nail Aqbhu nail joiqjaq doiqbev bev ma bhai ngaq nail Aqbhu nee jaoldeel-nvq thaq nail khe-ai, gaq lai-a nail tsaol-aq bhai iqsanl, ngaq nail joiqjaq doiqbev bev ma bhai ngaq-ai nee mail bhi jaoldeel nail ngaol. ²² Naqkhaol khal covq nail tsaol-aq, Aqhaqlal Miqyail Khali yaq munl juq bhai ge bhiq nail daoq bhai, aqmeeq-ai naldaiq yaoq'” dai, ge bhiq-a nail ngaol.

4

Nqtavq kovtavq bhai Miqyail bhai uqhuq thaoq nail ganl

¹ A bhai nee ngal-aq, ngal heldaiq gai-aivq-u phao, nqtavq kovtavq nail lolgov phao-ai thaq nail bhai ya moel-a nail ngaol. Iqmoeq-u phao, ngaq bhai daoq ge lavq khi ngal ya gaiq-a nail nqbho aqthel khe-ai kav nail aqthel al, niailhai ge nail ngaol: “Niilniai dav lal yaoq. Yaqhao pevq lal nail juq nail ganl naoq bhai ge bhiq naol” dai, ngaq bhai teevq pov gaq ge lavq-a nail ngaol.

² Aq-u phao, teevq pov taivq-ail, Aqhaqlal Miqyail ngaq bhai uvthaiq lee-a nail ngaol. Heldaig dei-eiq. Nqtavq kovtavq bhai doiqbev bev ma jiaq nail bhai maqkhaiq, doiqbev bev ma al bhai teevq gaq jaoldeel-nvq thaq nail bhai

maqkhaiq, ngal ya moel-a nail ngaol. ³ A bhai jaoldeel-nvq thaq nail al gaq, sainl aqnel nail lovmav khi mail aqbhaq mee nia phaqaol nail neltsaiq deel sainl lovmav khe-ai, dul nail ngaol. Aqniul niul nav nav nail sainl lovmav khe-ai dul nail haidallalkov, doiqbev bev ma al nail teevq jaoq jiav nail ngaol. ⁴ Doiqbev bev ma al nail teevq jaoq, doiqbev nvq tsel liq bev jiav nail ngaol. Doiqbev al nvq tsel liq bev bhai joiqmaoq mavmaoq nvq tsel liq gaq jaoldeel-nvq thaq nail ngaol. Aqyu juq neq, aqgaq aqdoi aqphul doinq khi, heel uqtsaoq tsaonq thaq nail ngaol. ⁵ Doiqbev bev ma a bhai nee mail, nqmeivq meivq khi ngjaiq jaiq nail aqthel mee nia phaqaol meel dol leevq-a nail ngaol. Doiqbev bev ma al nail sivatvq bhai, phalmanq sivq heeq tovq-ai thaq nail ngaol. Phalmanq al sivq heeq neq, Miqyail nail aqhaqlal sivq gaq ngaol. ⁶ Doiqbev bev ma al nail sivatvq bhai sainl khe-ai dul nail phaoqdaiq ngaqkha teevq kha jiav nail ngaol. Doiqbev bev ma al nail gaoltsi bhai maqkhaiq, jaoq jaoq dai maqkhaiq, aqdoevq phaqaol liq maol jaol nail ngaol. Al juq neq, sivatvq phao maqkhaiq, haoqnaol phao maqkhaiq, maivneev teevq bhee covq nail ngaol. ⁷ Iqmoeq khe maol neq, allaqjaqsil khe-ai dul nail ngaol. Nvq maol teevq maol neq, niaoqnel niaoqkhal khe-ai dul nail ngaol. Hail maol teevq maol neq, tsaol-aq nail maivphaoq covq nail ngaol. Liq maol teevq maol neq, bhail nail joelma maol ma khe-ai dul mail ngaol. ⁸ Aqdoevq phaqaol liq maol neq, yaoq maol yaoq-ao nee aqdaol kovq daol covq nail ngaol. Lavqkhoel phao maqkhaiq, lavqniil

phao maqkhaiq, maivneev teevq bhee covq nail
ngaol. Aqyu juq nqkiv n-gaol maqkhaiq, gaqnaq
maq naq dai, niailhai gul nail ngaol:

“Iqsanl nail kovtavq bhai
uvthaiq nail bhaqaoq eeq nail
Heeqphaq Miqyail neq,
meeq dee haol deedee nail ngaol.
Meeq dee haol deedee nail ngaol.
Meeq dee haol deedee nail ngaol.
Aivq neq, milnee uqnee iqsanl,
niil aq-il iqsanl doevq khi,
yaqhao iqsanl yavq kha lee nail
nqmaq maqluv halyeel
doevq nail Miqyail ngaol” dai,
khaq mao iqsanl gul nail ngaol.

⁹ Aqdoevq pha q al liq maol neq, doiqbev
bev ma bhai jaoldeel-nvq tha q nail, nqmaq
maqluv halyeel doevq nail gaq bhai tsiqeeq
tsiqheel nail nee ovqtavq, aivq bhai ev ev-ail,
“Seiqleiq khaogsail jiav dei-eiq” dai, gul-u phao,
¹⁰ joiqmaoq mavmaoq al nvq tsel liq gaq iqsanl,
doiqbev bev ma bhai jaoldeel-nvq tha q nail al
gaq nail sivtavq bhai peevqceevq kovdoi q doiq
nail lavqkhoel nee gaolbeiv khi, nqmaq maqluv
halyeel doevq nail al gaq bhai uqhuq thaoq-a nail
ngaol. Doiqbev bev ma al nail sivtavq bhai aqyu
juq nail heel uqtsaoq loev tha q khi ge nail:

¹¹ “Nvjuq nail
Heeqphaq Miqyail-ol,
yu naoq bhai tsiqeeq
tsiqheel nail maqkhaiq,
ev nail maqkhaiq,
naol bhaqaoq

ya dai maqkhaiq,
 geel-nvq nail ngaol.
 Khul khi mail dai
 ngal-aq neq,
 yaoq pha q yaoq-ao nee,
 naoq-i mail
 teivq-ai tha q nail ngaol.
 Naoq nail neenoeq
 needul bha qda nee,
 naol al juq bhai
 teivq-ai tha q khi,
 al juq pevq lal-a nail ngaol” dai,
 ge bhiq-a nail ngaol.

5

Yov-ai tha q nail haoqqavq khi mail Yaolyaq nail ganl

¹ Joiqjaq doiqbev bev ma bhai jaoldeel-nvq tha q nail ga q nail lavqmal lavq phao pavqyov yov-ai tha q nail haoqqavq teevq yov aol nail bhai, ngal ya moel-a nail ngaol. Haoqqavq al yov nail kovtavq phao maqkhaiq, lavqkhoel phao maqkhaiq, haoqqavq gevq-ai tha q nail ngaol. Haoqqavq al yov nail kovtavq bhai junq sivq dao deeq khi pheethaiq-ai tha q nail ngaol. ² Aq-u phao, ga q mao-ail kav nail nqtavq gaqkhoel teevq ga q aqthel aqkav kav dai gul nail: “Haoqqavq niil yov bhai phao khi, junq deeq-ai tha q nail juq bhai oil ha nail, kha q sil ga q geel-nvq nail-aiq” dai, gul nail bhai, ngal ya gaiq ya moel-a nail ngaol. ³ Haoqqavq al yov bhai neq, nqtavq kovtavq bhai jaol nail juq maqkhaiq, miltsaq kovtavq bhai jaol nail juq maqkhaiq, miltsaq

nail kov-uvq bhai jaol nail juq maqkhaiq, teevq gaq-ail maq phao nia-ail, maq heldaiq nia-ail.

⁴ Haoqgavq al yov bhai phao nail maqkhaiq, ge nail maqkhaiq, geel-nvq nail tsaol-aq teevq gaq bhai iqsanl maq halpov moel-a nail ngel-i mail, ngal nioil deedee-a nail ngaol. ⁵ Aq-u phao, joiqmaoq mavmaoq nail lavqkhoel khe teevq gaq ngaq bhai niailhai ge lavq-a nail ngaol: “Thaq nioil. Yuldav nail tsaol-aq nail jeq-e jaq-a lavqkhoel nee dov lal-a nail, allaqjaqsil dai khul nail, Daqbhil nail daoqtsail pevq nail gaq, gaq lai-aogq nail ngaol. Alheel ngel-i mail, haoqgavq al yov bhai iqsanl, junq deeq-ai thaq nail sivq lai q bhai iqsanl, aivq phao nia nail ngaol” dai, ge lavq-a nail ngaol.

⁶ A bhai nee ngal-aq, doiqbev bev ma khi mail aqdoevq pha q al liq maol nail gaoltsi bhai maqkhaiq, joiqmaoq mavmaoq al juq nail gaoltsi bhai maqkhaiq, thulphaol-nvq tha q nail yaol ya q bhai ngal ya moel-a nail ngaol. Yaol ya q al maol neq, deeq heivq nail bhai ya da q daiq-a nail khe-ai dul nail ngaol. Aivq neq, uqkheel sivq kheel covq khi, maivneev sivq neev covq nail ngaol. Maivneev al sivq neev neq, miltsaq kovtavq bhai doi dai, Miqyail-i mail khoel-ai leevq-a nail, aqhaqlal sivq ga q bhai ge nail ngaol.

⁷ Aq-u phao, Yaolyaq al ga q lai khi, doiqbev bev ma bhai jaoldeel-nvq tha q nail ga q nail lavqmal lavq bhai aol nail yov-ai tha q nail haoqgavq al yov oil lai-a nail ngaol. ⁸ Aivq lai qyov-ai tha q nail haoqgavq al yov oil-u phao, aqdoevq pha q al liq maol khi mail joiqmaoq mavmaoq al nvq tsel liq ga q Yaolyaq nail sivtavq bhai peevqceevq

kovdoiq doiq nail lavqkhoel nee gaolbeiv-a nail ngaol. Aqyu juq yaoq gaq yaoq-ao nee mail dil-nvq aol khi, tovq khi danq nail huqbhiq nil nail phaqq teevq bhee aol nail heel maiqgaoq iqsanl, tsinq-ai thaqq nail ngaol. Huqbhiq nil nail al phaqq neq, Miqyail nail tsaol-aq juq nail geeqlaoq hal daoq ngaol. ⁹ Aqyu juq tsiqeeq nail daoqsel aqsivq niailhai gul nail ngaol:

“Haoqgavq pavqyov
 al yov oil khi
 junq deeq-ai thaqq nail
 juq bhail phao nail neq,
 naol geel-nvq nail ngaol.
 Khul khi mail dai
 ngal-aq neq,
 naol deeq heivq nail bhail
 ya daq-a nail ngaol.
 Khul phaqq nail
 jeq-e bhail maqkhaiq,
 khul phaqq nail daoq ge nail
 tsaol-aq bhail maqkhaiq,
 jeq-e jaq-a
 iqsanl bhail maqkhaiq,
 milkhaoq yaoq khaoq
 yaoq-ao nee maqkhaiq,
 naol naoq nail aqsivq-i mail
 Miqyail nail haqqbhoil
 tsaol-aq yaqq bhail
 ul kovq-a nail ngaol.
¹⁰ Naol aqyu juq bhail
 Miqyail Milkhaoq
 lavqkhoel bhail
 heeqphaqq

pevq lal dai maqkhaiq,
 aivq nail Philma
 pevq lal dai maqkhaiq,
 nl bhiq-a nail ngaol.
 Aqyu juq
 miltsaq kovtavq bhai
 ya uvthaiq nail ngaol” dai,
 gul nail ngaol.

¹¹ Ngal gaoq heldaiq gai-aivq-u phao, mao deedee nail nqtavq gaqkhoel nail aqthel ya gaiq-a nail ngaol. Aqyu juq neq, aqdoevq pha q liq maol khi mail joiqmaoq mavmaoq al nvq tsel liq gaq bhai maqkhaiq, doiqbev bev ma al bhai maqkhaiq, teevq jaoq jaoljaoq-ai tha q nail ngaol. Aqyu juq neq, aqsainv aqlanv gaq bhee nail ngaol. ¹² Aqyu juq aqthel aqkav kav dai, niailhai gul nail ngaol:

“Deeq heivq nail bhai
 ya daq-a nail Yaolyaq neq,
 bhaqaoq maqkhaiq,
 phul heel ilda q
 maoqgaiq maqkhaiq,
 neenoeq neekha maqkhaiq,
 gaq kav nail pha q maqkhaiq,
 ev nail pha q maqkhaiq,
 seiqlaiq khaoqsail maqkhaiq,
 tsiqeeq nail pha q maqkhaiq,
 ya nail geel-nvq nail ngaol” dai,
 gul nail ngaol.

¹³ A bhai nee ngal-aq, nqtavq kovtavq bhai jaol nail juq maqkhaiq, miltsaq kovtavq bhai jaol nail juq maqkhaiq, miltsaq kov-uvq bhai jaol nail juq maqkhaiq, iqyaq iqma bhai jaol nail juq

maqkhaiq, al juq iqsanl mail niaillhai ge nail bhai
ngal ya gaiq-a nail ngaol:

“Joiqjaq doiqbev bev ma bhai
jaoldeel-nvq thaq nail
gaq bhai maqkhaiq,
Yaolyaq bhai maqkhaiq,
nqmaq maqluv halyeel
tsiqeeq nail phaqa,
ev nail phaqa,
seiqlaiq khaoqsail
khi mail uvthaiq nail
bhaqaqaq jiaq dei-eiq” dai,
aqyu juq gul nail ngaol.

¹⁴ Aq-u phao, aqdoevq phaqa al liq maol,
“Aqmiq” dai, ge-a nail ngaol. Joiqmaoq mav-
maoq al juq neq, peevqceevq kovdoiqa doiqa nail
lavqkhoel nee gaolbeiv khi uqhuqa thaoqa-a nail
ngaol.

6

Junq deeq-ai thaqa nail juq nail ganl

¹ A bhai nee ngal-aq, Yaolyaq neq, junq deeq-
ai thaqa nail al sivq laiqa nail lavqkhoel khe teevq
laiqa bhai phao nail bhai, ngal ya moel-a nail
ngaol. Aqdoevq phaqa al liq maol nail lavqkhoel
khe teevq maol nqjaiqa jaiqa nail aqthel khe-ai,
“Lal yaoqa” dai, mailma-ail khul nail bhai, ngal
ya gaiqa-a nail ngaol. ² Ngal heldaiqa gai-aivq-
u phao, moeqphaqa aqphul teevq maol bhai, ya
moel-a nail ngaol. Moeqphaqa al maol bhai jeeq-
nq thaqa nail gaqa, heeqnav teevq khaoqa bavq-nvq
thaqa nail ngaol. Aivq bhai heel uqtsaoqa bhi tsaqa

khi, aivq neq, gaq lai-a nail gaq bhi pevq-a nail khe-ai, neejlav jiav nail juq bhai gaq lai dai, dov ail-a nail ngaol.

³ Yaolyaq neq, jung deeq-ai thaq nail nvq laiq teevq laiq bhai phao-u phao, aqdoevq pha q nvq maol teevq maol, “Lal yaoq” dai, khul nail bhai, ngal ya gaiq-a nail ngaol. ⁴ Aq-u phao, moeqphaq aqnel teevq maol dov lee-a nail ngaol. Moeqphaq al maol bhai jeeq-nq thaq nail gaq, miltsaq kovtavq bhai tsaol-aq yaq nail gaiqlaq bhai, tsaq lai jil lai nail pha q bhai oil dov khi, aqyu juq teevq gaq nee teevq gaq bhi deeq heivq nia nail aqkhaoganq bivq-a nail ngaol. Al ovqtavq, aivq bhai thaoma keiv ma teevq keiv bivq-a nail ngaol.

⁵ Yaolyaq jung deeq-ai thaq nail hail laiq teevq laiq bhai phao-u phao, aqdoevq pha q hail maol teevq maol, “Lal yaoq” dai, khul nail bhai ngal ya gaiq-a nail ngaol. Ngal heldaiq gai-aivq-u phao, moeqphaq aqnav teevq maol bhai ya moel-a nail ngaol. Moeqphaq al maol bhai jeeq-nq thaq nail gaq, jaluv teevq laiq oil-nq thaq nail ngaol.

⁶ Aqdoevq pha q al liq maol nail gaoltsi bhai, daoq ge nail khe-ai dul nail aqthel bhai ngal ya gaiq-a nail ngaol. Aqthel al neq, niailhai ge nail ngaol: “Mo evq nail sivq nail pha q kev lee khi, gov teevq bhanq bhai teevq bavq ngaol. Laoqloil hail bhanq bhai teevq bavq ngaol. Aqtseel khi aqheeq tsilju nail ullul tha q bhi cov-ail” dai, ge nail gaol.

⁷ Yaolyaq neq, jung deeq-ai thaq nail liq laiq teevq laiq bhai phao-u phao, aqdoevq pha q liq maol teevq maol, “Lal yaoq” dai, khul nail bhai,

ngal ya gaiq-a nail ngaol. ⁸ Ngal heldaiq gai-aivq-u phao, aqheel heel nav nav nail moeqphaq teevq maol bhai ya moel-a nail ngaol. Moeqphaq al maol bhai jeeq-nq thaq nail gaq bhai, sil nail heeqphaq dai khul nail ngaol. Sil nail milkhaoq nail heeqphaq aivq nail haoqnao tsaothe jaol nail ngaol. Aqyu nvq gaq bhai miltsaq niil liq bhoil teevq bhoil bhai uvthaiq nail aqkhaogang bivq-a nail ngaol. Thaoma, moevq nail sivq nail, nal nail goel nail khi, haqev nail jaiqyaq juq, niil juq bhai juq juq-ail yu bhai lav heivq dai iqsanl, aqyu nvq gaq aqkhaogang ya-a nail ngaol.

⁹ Yaolyaq neq, jung deeq-ai thaq nail ngaq lai q teevq lai q bhai phao-u phao, laol duq nail kov-uvq bhai aqhaqlal juq jaol nail bhai ngal ya moel-a nail ngaol. Aqhaqlal al juq neq, Miqyail nail daoq cavq-a nail bhaqda nee maqkhaiq, salkhil khanq-a nail bhaqda nee maqkhaiq, deeq heivq nail bhai ya daq-a nail tsaol-aq nail aqhaqlal ngaol. ¹⁰ Aqyu juq aqthel aqkav kav dai, gul nail: “Tsaq nail pha q aol khi meeq nail haol nail, bhaqaoq eeq nail Heeqphaq-ol, nvjuq nail aqsivq bhai bhi il dov gil lavq-a nail miltsaq kovtavq bhai jaol nail tsaol-aq bhai, yalkhaq dal khi khoeq bhiq jiovq bhiq nail, khaq mao kev dai, jiav-ai haq nail-aiq” dai, gul nail ngaol. ¹¹ Aq-u phao, aqyu juq yaoq gaq yaoq-ao nee bhai phulleq deel phaikhaoq heelma teevq gaq bhai teevq keiv bivq-a nail ngaol. “Nuljuq khe-ai deeq heivq-a nail bhai ya daq-a nail, nuljuq khe-ai Khali nail yaqkav jiovq khi nuljuq nail aqivq jaqbheq pevq nail, nuljuq iqsanl nail munl bhee lal dai neq, teevq yang daong haq lao” dai, aqyu

juq bhai ge bhiq-a nail ngaol.

¹² Yaolyaq jung deeq-ai thaq nail kovq lai q teevq lai q bhai phao nail bhai ngal heldai q gai- aivq-u phao, milluv luv deedee nail bhai ya gai q, ya moel-a nail ngaol. Nlma navtsee deel jinq daqiq khe-ai pevq-ail khi, bhala iqsanl aqsivq khe-ai, pevq ail-a nail ngaol. ¹³ Lilmoel lil ma bhoe lal khi, heegguq aqheeq aqqiq ga nail khe-ai, nqtavq bha jiav nail aqgil juq miltsaq kovtavq bhai ga lee-a nail ngaol. ¹⁴ Haoqgavq aqpavq lai qyov nail khe-ai, nqtavq peivq ail-a nail ngaol. Gaoqjaoq iqsanl khi, eeljaol laol-n iqsanl yovqgavq nail jaol duq nee jiiv dov ail-a nail ngaol.

¹⁵ A bhai nee ngal-aq, milkhaoq khe heeqphaq juq maqkhaiq, eeq nail heel nail juq maqkhaiq, genl dev nail kovtavq bhai uvthai q nail aqivq juq maqkhaiq, hulmeeq meeq khi bhaqaoq jiav nail juq maqkhaiq, yaoq juq yaoq maqkhaiq, yaqkav juq khi yaqkav maq ngel nail juq maqkhaiq, lovphail khaoqbhaoq lavqkhoel khi gaoqjaoq bhai jiav nail lovmav juq nail gaiqlaq bhai tsoq uvq-ai thaq nail ngaol. ¹⁶ Aqyu juq gaoqjaoq juq khi lovmav juq bhai khul khul-ail khi, “Doiqbev bev ma bhai jaoldeel-nvq thaq nail gaq, nvjuq bhai maq ya moel dai maqkhaiq, Yaolyaq neema phail nail bhai, nvjuq ya jel-ail dai maqkhaiq, nvjuq bhai uvthai q lee lavq yaoq. ¹⁷ Khul khi mail dai ngal-aq neq, geesil deedee lal heeq pha- q-ail pevq nail aqyu nvq gaq neema phail nail aqn kev lee-aq thaq nail bhai, khaq sil gaq khanq tsaol heeq” dai, gul nail ngaol.

7

Junq deeq-ai thaq nail Ilsaqlaiqlal nail tsaol-aq teevq sainv liq meel-nvq liq hinl gaq nail ganl

¹ A bhai nee ngal-aq, milma liq phaoq liq khoel bhai nqtavq gaqkhoel liq gaq thulphaol nail bhai, ngal ya moel-a nail ngaol. Aqyu juq neq, miltsaq kovtavq bhai maqkhaiq, iqyaq iqma bhai maqkhaiq, aqbhaol iqsanl juq bhai maqkhaiq, lilmoel maq bhi bhoe dai, milma liq phaoq liq khoel nail lilmoel bhai nieivq thaiq-ai thaq nail ngaol. ² Aq-u phao, nqtavq gaqkhoel yaoq gaq yaoq, nlma dovkhoeq phao nee dav lal nail bhai, ngal ya moel-a nail ngaol. Aivq neq, doevq nail Miqyail nail junq aol nail ngaol. Aivq miltsaq khi mail iqyaq iqma bhai khoeq bhiq jiovq bhiq nail bhaqaoq ya-a nail nqtavq gaqkhoel al liq gaq bhai, niailhai gul bhiq-a nail ngaol: ³ “Ngadao nail Miqyail nail yaqkav juq nail neeqthel bhai aivq nail junq maq deeq gaq-u neq, miltsaq bhai maqkhaiq, iqyaq iqma bhai maqkhaiq, aqbhaol juq bhai maqkhaiq, thaq khoeq thaq jiovq bhiq haq lao” dai, ge bhiq-a nail ngaol.

⁴ Aq-u phao, junq deeq-ai thaq nail tsaol-aq khadai gaq jaol nail-aiq dai, ngal yaq gaiq-a nail ngaol. Ilsaqlaiqlal nail jeq-e jaq-a iqsanl nail lavqkhoel, junq deeq-ai thaq nail tsaol-aq teevq sainv liq meel-nvq liq hinl gaq jaol nail ngaol.

⁵ Yuldav nail jeq-e jaq-a
lavqkhoel khe
teevq meel-nvq nvq hinl gaq.
Lulbheiq nail jeq-e jaq-a
lavqkhoel khe

teevq meel-nvq nvq hinl gaq.

Gav nail jeq-e jaq-a

lavqkhoel khe

teevq meel-nvq nvq hinl gaq.

⁶ Aqsagnail jeq-e jaq-a

lavqkhoel khe

teevq meel-nvq nvq hinl gaq.

Naqtaqlil nail jeq-e jaq-a

lavqkhoel khe

teevq meel-nvq nvq hinl gaq.

Maqnaqseiq nail jeq-e jaq-a

lavqkhoel khe

teevq meel-nvq nvq hinl gaq.

⁷ Silmiqoq nail jeq-e jaq-a

lavqkhoel khe

teevq meel-nvq nvq hinl gaq.

Leiqbhil nail jeq-e jaq-a

lavqkhoel khe

teevq meel-nvq nvq hinl gaq.

Ilsaqqhaq nail jeq-e jaq-a

lavqkhoel khe

teevq meel-nvq nvq hinl gaq.

⁸ Seiqbhulloq nail jeq-e jaq-a

lavqkhoel khe

teevq meel-nvq nvq hinl gaq.

Yaolsai nail jeq-e jaq-a

lavqkhoel khe

teevq meel-nvq nvq hinl gaq.

Bheiqyaqmiq nail jeq-e jaq-a

lavqkhoel khe

teevq meel-nvq nvq hinl gaq.

Tsaol-aq niidai gaq bhai junq deeq-ai thaq nail
ngaol.

*Phulleq deel phailkhaoq heelma doi-nq thaq
nail juq nail ganl*

⁹ A bhai nee ngal-aq, ngal heldaiq gai-aivq-u phao, milkhaoq yaoq khaoq yaoq-ao nee nail lavqkhoel bhai maqkhaiq, khul pha q nail jeq-e bhai maqkhaiq, jeq-e jaq-a iqsanl nail lavqkhoel bhai maqkhaiq, khul pha q nail daoq ge nail tsaol-aq juq nail lavqkhoel bhai maqkhaiq, teevq gaq iqsanl maq ge gil tsaol nail tsaol-aq munl munl ma bhai, ngal ya moel-a nail ngaol. Aqyu juq neq, phulleq deel phailkhaoq heelma doi khi, aqyu juq nail aqlavq lavqkhoel bhai neq, dal-aol lavqmeiv bavq-nvq tha q khi, doiqbev bev ma nail sivtavq bhai khi, Yaolyaq nail sivtavq bhai thulphaol-nvq tha q nail ngaol. ¹⁰ Aqyu juq aqthel aqkav kav dai gul nail:

“Joiqjaq doiqbev bev ma bhai
jaoldeel-nvq tha q nail
ngadao nail Miqyail khi mail,
Yaolyaq bha qda nee,
hevqkovq nail pha q
ya-a nail ngaol” dai,
gul nail ngaol.

¹¹ Nqtavq gaqkhoel iqsanl mail, doiqbev bev ma bhai maqkhaiq, joiqmaoq mavmaoq juq bhai maqkhaiq, aqdoevq pha q liq maol bhai maqkhaiq, teevq jaoq thulphaol-nvq tha q nail ngaol. Aq-u phao, nqtavq gaq khoel al juq, doiqbev bev ma nail sivtavq phao peevqceevq kovdoi q doi q nail lavqkhoel nee gaolbeiv khi, Miqyail bhai uqhuq tha oq-a nail ngaol. ¹² Aqyu juq ge nail:

“Aqmiq!

Geeqlaoq eeq nail
 phaḡ maḡkhaiḡ,
 seiḡleiḡ khaoḡsail maḡkhaiḡ,
 neenoḡeq neekha maḡkhaiḡ,
 tsiḡeeḡ nail phaḡ maḡkhaiḡ,
 ev nail phaḡ maḡkhaiḡ,
 bhaḡaoḡ khi mail
 gaḡ kav nail phaḡ maḡkhaiḡ,
 ngadao nail Miḡyail nail
 kovtavḡ bhai nḡmaḡ maḡluḡv
 halyeel jiav dei-eiḡ.
 Aḡmiḡ” dai,
 ge nail ngaol.

¹³ Aḡ-u phao, joiḡmaoḡ mavmaoḡ nail
 lavḡkhoel bhai aol nail teevḡ gaḡ ngaḡ bhai,
 “Phulleḡ dai phailkhaoḡ heelma doi-nḡ thaḡ
 nail tsaol-aḡ niil juḡ, khaḡ sil gaḡ. Aḡyu juḡ
 khaḡ bha nee mail lal-a nail-aiḡ” dai, naldaiḡ
 lavḡ-a nail ngaol.

¹⁴ Ngal neḡ, aivḡ bhai, “Heeqphaḡ-ol, naol
 heeq nia nail ngaol” dai, ge kovḡ bhiḡ-a nail
 ngaol. Aḡ-u phao, aivḡ ge nail: “Tsaol-aḡ niil
 juḡ neḡ, kav deedeḡ nail khoḡq nail jioḡvḡ nail
 lavḡkhoel nee dov lal-a nail ngaol. Aḡyu juḡ
 neḡ, yovḡḡavḡ nail phailkhaoḡ heelma bhai,
 Yaolyaḡ nail aḡsivḡ-i mail phulleḡ dai, tsiḡ haol-
 ai thaḡ nail ngaol. ¹⁵ Alheel ngel-i mail, aḡyu juḡ
 Miḡyail nail doiḡbev bev ma nail sivtavḡ phao
 jaol khi, aivḡ nail uḡhuḡ thaḡq nail ilkhaol il ma
 lavḡkhoel, nḡkiv n-gaol maḡkhaiḡ, aivḡ nail ganl
 nl thailthaiḡ nail ngaol. Doiḡbev bev ma bhai
 jaoldeel-nvḡ thaḡ nail gaḡ, aḡyu juḡ nee mail
 jaol khi, aḡyu juḡ bhai heldaiḡ phaill bhiḡ nail

ngaol. ¹⁶ Aqyu juq neq, aoq iqsanl, ulcuvq iqsanl, maq moevq lal yaoq-aol. Nltsal covq nail bhai maqkhaiq, aqlaol haquvq nail khul pha q bhai maqkhaiq, maq ya daq yaoq-aol. ¹⁷ Khul khi mail dai ngal-aq neq, doiqbev bev ma nail gaoltsi bhai jaol nail Yaolyaq neq, yaol bhai lovq phail bhiq nail khe-ai, aqyu juq bhai heldaiq phail bhiq nail ngaol. Aqdoevq bhi doevq lal nail ulcuvq eelbev jiav nail bhai, aqyu juq bhai hel-aivq nail ngaol. Miqyail aqyu juq nail maivbhil iqsanl bhai siv bhiq nail ngaol” dai, ngaq bhai ge lavq-a nail ngaol.

8

Junq deeq-ai tha q nail sivq lai q teevq lai q nail ganl

¹ Yaolyaq junq deeq-ai tha q nail sivq lai q teevq lai q bhai phao-u phao, naqli teevq khaoqai q niidai, nqtavq kovtavq bhai aqtsi tsu dai pevq ail-a nail ngaol.

² Aq-u phao, Miqyail nail sivitavq bhai thulphaol-nvq tha q nail nqtavq gaqkhoel sivq gaq bhai, ngal ya moel-a nail ngaol. Nqtavq gaqkhoel al sivq gaq bhai, teevq gaq bhai nqbho teevq bhao bivq-a nail ngaol.

³ A bhai nee ngal-aq, heel iqiaoq tsiq-nq tha q nail nqtavq gaqkhoel yaoq gaq yaoq dov lee khi, laol duq agjail bhai thulphaol-nvq tha q nail ngaol. Doiqbev bev ma nail sivitavq bhai jiav nail heel-i mail lav sav-ai tha q nail laol duq nail kovtavq bhai, Miqyail nail tsaol-aq iqsanl nail geeqiaoq nee mail laol bhai nail dai khi, tovq

khi dang nail huqbhiq nil nail phaqa maodai, aivq bhai bivq-a nail ngaol. ⁴ Aq-u phao, nqtavq gaqkhoel nail aqlavq lavqkhoel bhai aol nail tovq khi dang nail huqbhiq nil nail phaqa nail miqkhoiq neq, aivq nail tsaol-aq nail geeqlaoq hal daoq nee mail teevq gaq khe-ai, Miqyail nail sivtavq bhai dav lai-a nail ngaol. ⁵ Nqtavq gaqkhoel al gaq, iqiaoq al heeq bhai tsiq khi, laol duq bhai tovq thailthaiq nail miqjaq teevq bhoi tsiq bhoel khi, miltsaq kovtavq bhai liv kha gai-aivq-a nail ngaol. Aq-u phao, nqjaiq jaiq nail mee nia phaqa nail aqthel meel dol leevq-a nail ngaol. Nqmeivq iqsanl meivq, milluv iqsanl luv lal-a nail ngaol.

Nqbho jiv nail ganl

⁶ Nqbho sivq laiqa oil-nq thaqa nail nqtavq gaqkhoel al sivq gaq, nqbho jiv nail dai khi, lainq-ai thaqa nail ngaol.

⁷ Nqtavq gaqkhoel iqmoeq khe gaq nqbho jiv-u phao, aqsivq kheq nail ollov khi miqjaq, miltsaq kovtavq bhai ga lee-a nail ngaol. Miqjaq al-i mail miltsaq hail bhoil teevq bhoil bhai maqkhaiq, aqbhaol hail bhoil teevq bhoil bhai maqkhaiq, niul jiaovq deel moeqgaq iqsanl maqkhaiq, poiv jaq gil-a nail ngaol.

⁸ Nqtavq gaqkhoel nvq gaq teevq gaq nqbho jiv-u phao, miqjaq tovq nail gaoqjaoq jaoq ma khe-ai dul nail teevq phaqa, iqyaq iqma bhai liv puvq-a nail ngaol. Iqyaq iqma hail bhoil teevq bhoil aqsivq pevq ail-a nail ngaol. ⁹ Iqyaq iqma lavqkhoel khe aqdoevq juq, hail bhoil teevq bhoil

sil-a nail ngaol. Laovq hail bhoil teevq bhoil iqsanl, cov ail-a nail ngaol.

¹⁰ Nqtavq gaqkhoel hail gaq teevq gaq nqbho jiiiv-u phao, miqjaq jaibhoil khe-ai tovq nail aqgil gil ma teevq heeq nqtavq nee ga lee khi, ulcuvq laol jaol hail bhoil teevq bhoil nail kovtavq bhai maqkhaiq, ulcuvq eelbev juq nail kovtavq bhai maqkhaiq, ga dav-a nail ngaol. ¹¹ Aqgil al heeq bhai, aqkhaq khaq deede nail aqbhaol dai khul nail ngaol. Ulcuvq hail bhoil teevq bhoil bhai neq, aqkhaq pevq-ail khi dov lal-a nail ngel-i mail, tsaol-aq maodai gaq sil-a nail ngaol.

¹² Nqtavq gaqkhoel liq gaq teevq gaq nqbho jiiiv-u phao, nlma hail bhoil teevq bhoil, bhala hail bhoil teevq bhoil khi aqgil hail bhoil teevq bhoil cov ail-a nail ngel-i mail, al juq nail aqbhaq hail bhoil teevq bhoil navtsee dai, pevq ail-a nail ngaol. N-gaol hail bhoil teevq bhoil aqbhaq maq bhaq mail, nqkiv hail bhoil teevq bhoil iqsanl alhai dul dai, aqbhaq maq bhaq-ail.

¹³ Ngal heldaiq gai-aivq-u phao, nqtavq nail gaoltsi bhai joelma maol ma teevq maol bhail nail ngaol. Joelma al maol mailma-ail kav nail aqthel nee ge nail: "Allol-oq, nqbho maq ya jiiiv-a nail nqtavq gaqkhoel al hail gaq, nqbho jiiiv lal-a nail aqthel bhaqda nee, miltsaq kovtavq bhai jaol nail tsaol-aq yaq geeqlaoq aqdoil, geeqlaoq aqdoil, geeqlaoq aqdoil ya nail ngaol" dai, gul nail bhai ngal ya gaiq-a nail ngaol.

9

¹ Nqtavq gaqkhoel ngaq gaq teevq gaq nqbho jiiiv-u phao, nqtavq nee mail miltsaq kovtavq

bhai ga lee thaq nail aqgil teevq heeq bhai ngal ya moel-a nail ngaol. Aqgil al heeq bhai mao-ail navq nail khaqduq nail taovq taovqphoil bivq-a nail ngaol. ² Aq-u phao, aqgil al heeq mao-ail navq nail khaqduq al duq bhai phao-a nail ngaol. Miqjaq jaibhoil bhoil ma nail miqkhoiq khe-ai, khaqduq al duq nee miqkhoiq dov lal-a nail ngaol. Miqkhoiq al bhaqda nee, nlma navtsee dai pevq-ail khi, lilmoel lavqkhoel bhai iqsanl navtsee dai, pevq ail-a nail ngaol. ³ Miqkhoiq al nail lavqkhoel nee, noelbhoel maodai dov lal khi, miltsaq kovtavq bhai ga lee-a nail ngaol. Noelbhoel al juq bhai miltsaq kovtavq khe bhoiqkeiv lavqmav nail bhaqaoq khe-ai dul nail bhaqaoq bivq-a nail ngaol. ⁴ “Miltsaq kovtavq bhai doevq nail moeqgaq bhai maqkhaiq, aqpavq aqniul khal niul nail yaoq pha q yaoq-ao nee bhai maqkhaiq, aqbhaol iqsanl bhai maqkhaiq, thaq lav cov dei-eiq, neeqthel bhai Miqyail nail junq maq deeq-ai thaq nail tsaol-aq bhai taivq-ail lav cov yaoq” dai, noelbhoel al juq bhai ge bhiq-a ngaol. ⁵ Thailhai ngaol-aq, noelbhoel al juq, tsaol-aq bhai lav heivq nail aqkhaoqanq maq ya-al. Bhala ngaq heeq bhee dai, khoeq bhiq jiovq bhiq nail aqkhaoqanq taivq-ail ya-a nail ngaol. Noelbhoel-i mail keivq nail bhai ya daq nail gaq neq, bhoiqkeiv lavqmav-i mail keivq-a nail khe-ai, nal nail ngaol. ⁶ Aqyanq al yanq nail lavqkhoel neq, tsaol-aq yaq juq sil nail pha q bhai halpov khi ngaol-aq, maq halpov moel nia-ail. Aqyu juq sil movq deede k khi ngaol-aq, sil nail pha q aqyu juq nee mail tsaol dol-aivq nail ngaol.

⁷ Noelbhoel al juq neq, genl dev nail dai

khi, lainq-ai thaq nail moeqphaq khe-ai dul nail ngaol. Heel uqtsaoq khe-ai dul nail pha q noelbhoel al juq nail uqhuq bhai tsaol-nq tha q nail ngaol. Aqyu juq nail maivphaoq neq, tsaol-aq nail maivphaoq khe-ai dul nail ngaol. ⁸ Aqyu juq nail tsailkheel neq, yaqmai-aq nail tsailkheel khe-ai dul khi, aqyu juq nail aqhaoq neq, allaqjaqsil nail aqhaoq khe-ai dul nail ngaol. ⁹ Aqyu juq nail neema bhai doe qdaq nail pha q neq, hail-i mail lav sav-ai tha q nail khe-ai dul nail ngaol. Aqyu juq nail aqdaol daol deedee nail aqthel neq, genl dev nail bhai tsaol-aivq nail moeqphaq lalaoq maodai nail aqthel khe-ai dul nail ngaol. ¹⁰ Aqyu juq nail daoqmiq neq, bhoiqkeiv lavqmav nail daoqmiq khe-ai dul khi, daoqmiq bhai bhaiqnieivq covq khi dovq aol nail ngaol. Aqyu juq nail daoqmiq lavqkhoel bhai, bhala ngaq heeq bhee dai, tsaol-aq yaq bhai khoeq bhiq jiovq bhiq nail bhaqaoq aol nail ngaol. ¹¹ Aqyu juq nail heeqphaq neq, mao-ail navq nail khaqduq nail gaqkhoel ngaol. Aivq nail aqmil neq, Heiqbhail daoq Aqbhaqdoq dai, khul khi, Heiqlaqsal daoq neq, Aqphaollil-oq dai, mil-ai tha q nail ngaol. Daoqceevq neq, lav luq lav seil nail gaq dai, ge nail ngaol.

¹² Geeqlaoq aqdoil iqmoeq khe pha q gil-aq q nail ngaol. Geeqlaoq aqdoil nvq pha q gaoq kev lee-ai haq nail ngaol.

¹³ Nqtavq gaqkhoel kovq gaq teevq gaq nqbho jiiiv-u phao, Miqyail nail sivtavq bhai jlav nail heel-i mail lav sav-ai tha q nail laol duq nail uqkheel liq kheel nee mail aqthel meel dol leevq-a nail bhai, ngal ya gaiq-a nail ngaol. ¹⁴ Aqthel al

neq “Ul bhaqlal laoljaol jaol ma nail jail-nq bhai pheethaiq-ai thaq nail nqtavq gaqkhoel liq gaq bhai phaiq bhiq yaoq” dai, nqbho oil-nq thaq nail nqtavq gaqkhoel kovq gaq teevq gaq bhai ge bhiq-a nail ngaol. ¹⁵ Alheel ngel-i mail, miltsaq tsaol-aq yaq juq bhai hail bhoil teevq bhoil heivq nail dai khi, lainq-ai thaq nail nqtavq gaqkhoel al liq gaq bhai Miqyail-i mail phaiq bhiq khi, aqyanq al yanq nail haqbhoil, aqkovq al kovq nail haqbhoil, bhala al heeq nail haqbhoil, aqn al n nail haqbhoil, bhi jaol-ai thaq nail ngaol. ¹⁶ Moeqphaq jeeq-nq thaq nail genl dev nail juq khadai gaq bhee nail dai, ngal ya gaiq-a ngaol. Aqyu juq neq, nvq yal lanv gaq bhee nail ngaol.

¹⁷ Aqhaqlal lavqkhoel nee ngaq-i mail ya moel-a nail moeqphaq khi mail, moeqphaq jeeq-nq thaq nail juq neq, niailhai ngaol. Moeqphaq jeeq-nq thaq nail al juq neq, neema bhai doe-qdaq duq doi-nq thaq nail ngaol. Doe-qdaq duq al neq, miqjaq khe-ai neltsaiq dai nel khi, lenl lenl nav khi mail miqjal jalheel khe-ai heel tsaiq deel ngaol. Moeqphaq al juq nail uqhuq neq, allaqjaqsil nail uqhuq khe-ai dul nail ngaol. Al ovqtavq, moeqthaoq lavqkhoel bhai miqjaq miqlail, miqjaq nail miqkhoiq khi mail miqjal jalheel dov lal thailthaiq nail ngaol.

¹⁸ Moeqthaoq lavqkhoel nee dov lal thailthaiq nail miqjaq miqlail, miqjaq miqkhoiq khi mail, miqjal jalheel kheq nail, khoeq nail jiovq nail niil hail pha q bhaqda nee, miltsaq tsaol-aq hail bhoil teevq bhoil sil-a nail ngaol. ¹⁹ Moeqphaq al juq nail bhaqaoq neq, aqyu juq nail moeqthaoq khi mail daoqmiq nail lavqkhoel bhai aol nail ngaol.

Aqyu juq nail daoqmiq neq, eellel khe-ai dul khi, uqhuq iqsanl covq nail ngaol. Uqhuq al nee mail yu bhai khoeq bhiq jiovq bhiq-a nail ngaol.

²⁰ Thailhai ngaol-aog, khoeq nail jiovq nail al hail pha q nail kov-uvq bhai maq sil dai jel ail-a nail tsaol-aq, yovqgavq nail aqlavq-i mail nl-ai tha q nail juq bhai maq noeq pov-ail, aqyu juq neq, neivq bhai uqhuq tha oq nail maqkhaiq, phul, heel, giqheel, lovmav khi mail aqbhaol-i mail lav sav-ai tha q nail maq moel nia, maq gaiq nia, gailkhaol iqsanl maq tsa o nia nail tha oqphaoq aqma maolkhoel bhai uqhuq tha oq nail maqkhaiq, aqyu juq maq khaonq ha-al. ²¹ Tsaol-aq al juq neq, yu bhai heivq nail pha q bhai maqkhaiq, neivq bhai laol nail sail nail pha q maqkhaiq, khaqmiq sev nail pha q maqkhaiq, yu nail nlmaoq bhai khoiq nail pha q bhai maqkhaiq, maq noeq pov-ail.

10

Nqtavq gaqkhoel khi haoqgavq pavqyov yov yaq teevq yov nail ganl

¹ Aq-u phao, gaq mao-ail kav nail nqtavq gaqkhoel teevq gaq ngdil doi khi, nqtavq nee mail yavq kha lee thailthaiq nail bhai, ngal ya moel-a nail ngaol. Aivq neq, haildallalkov uqjeeq jeeq-nq tha q nail ngaol. Aivq nail maivphaoq neq, nlma khe-ai dul khi, aivq nail aqkhill neq, miqjaq nail ilkhel khe-ai, dul nail ngaol. ² Aivq nail aqlavq lavqkhoel bhai phao-ai tha q nail haoqgavq pavqyov yov yaq teevq yov aol nail ngaol. Aivq nail lavqmal phao khe aqkhill neq,

iqyaq iqma bhai naoq thaiq-ai thaq nail ngaol. Lavqtsel phao khe aqkheil neq, miltsaq bhai naoqthaiq-ai thaq nail ngaol. ³ Allaqjaqsil geeq nail khe-ai, aivq aqthel mailma-ail gul nail ngaol. Aq-u phao, nqjaiq jaiq nail aqthel sivq thel meel dol leevq-a nail ngaol. ⁴ Nqjaiq jaiq nail aqthel meel dov-ai leevq gaq-u phao, ngal aqthel al bhai gevq thaq-ai nail khi ngaol. Thailhai ngaol-aog, nqtavq nee mail aqthel meel dov-ai leevq khi, “Nqjaiq jaiq nail aqthel sivq thel meel dov-ai leevq nail bhai junq deeq yaoq. Al bhai thaq gevq” dai, ge lavq nail bhai ngal ya gaiq-a nail ngaol.

⁵ Aq-u phao, iqyaq iqma khi miltsaq bhai naoqthaiq-ai khi thulphaol-nvq thaq nail bhai ngaq-i mail ya moel-a nail nqtavq gaqkhoel al gaq, aivq nail lavqmal lavq nqtavq phao bhaqdil-a nail ngaol. ⁶ A bhai nee ngal-aq, nqmaq maqluv halyeel doevq nail gaq pevq nail, nqtavq, miltsaq, iqyaq iqma khi al juq nail lavqkhoel khe khal doevq khal jaol nail pha q iqsanl bhai teivq-a nail Miqyail nail aqmil kov-uvq nee niailhai ge nail ngaol: “Aqyanq maq jiav yaoq-aol. ⁷ Nqtavq gaqkhoel sivq gaq teevq gaq, aivq nail nqbho jiiv nail aqthel meel dol leevq nail aqyanq kev lee-u phao, Miqyail-i mail oil tsail-ai thaq nail pha q bhee lal nail ngaol. Oil tsail-ai thaq nail al pha q neq, Miqyail nail yaqkav pevq nail aivq nail haqbhoil gedan nail juq bhai ge-ai thaq nail khe-ai pevq lal naol” dai, khanq-a nail ngaol.

⁸ Aq-u phao, nqtavq nee mail meel dov-ai leevq nail bhai, ngaq-i mail ya gaiq-a nail aqthel al, ngaq bhai niailhai gaoq ge lavq-a nail

ngaol: “Iqyaq iqma khi miltsaq nail kovtavq bhai naoqthaiq khi thulphaol-nvq thaq nail nqtavq gaqkhoel al gaq nail aqlavq lavqkhoel bhai aol nail, phao-ai thaq nail haoqgavq al yov oil lai yaoq” dai, ge lavq-a nail ngaol.

⁹ Alheel ngel-i mail, “Ngaq bhai haoqgavq yov yaq thoil yov bivq lavq yaoq” dai, nqtavq gaqkhoel al gaq bhai ge bhiq lai-a nail ngaol. Aivq ge nail: “Oil khi jaq yaoq. Naoq nail ovqmav lavqkhoel bhai aqkhaq ngaol. Thailhai ngaol-aog, naoq nail moeqthaoq lavqkhoel bhai neq, bhaiqtsil bhaiqeel khe-ai tsilju gaoq deel ngaol” dai, ge lavq-a nail ngaol. ¹⁰ Aq-u phao, ngal nqtavq gaqkhoel al gaq nail aqlavq lavqkhoel bhai aol nail haoqgavq yov yaq al yov bhai oil jaq-a nail ngaol. Ngaq nail moeqthaoq lavqkhoel bhai neq, bhaiqtsil bhaiqeel khe-ai tsilju gaoq dai, pevq-ail nial. Thailhai ngaol-aog, haoqgavq al yov jaq gaq-u phao, ngaq nail ovqmav lavqkhoel bhai neq, aqkhaq khaq lal-a nail ngaol. ¹¹ Aq-u phao, aivq ngaq bhai gaoq ge lavq-a nail: “Tsaol jeq-e maodai jeq-e nail ganl maqkhaiq, milkhaoq maodai khaoq nail ganl maqkhaiq, daoq mee nia phaqaq nail ganl maqkhaiq, heeqphaq maodai gaq nail ganl maqkhaiq, Miqyail naoq bhai bhi ge lavq nail khe-ai, naol ya ge bhiq nail ngaol” dai, ge lavq-a nail ngaol.

11

Salkhil khanq nail nvq gaq nail ganl

¹ A bhai nee ngal-aq, tsa daiq nail pha q khe-ai dul nail lunl aqkha oq teevq kha oq nga q bhai bivq lavq khi ge lavq-a nail: “Thul yaoq. Miqyail nail uqhuq thaoq nail ilkhaol il ma bhai maqkhaiq, laol duq bhai maqkhaiq, tsa daiq khi, uqhuq thaoq nail ilkhaol il ma nail lavqkhoel bhai uqhuq thaoq lal-a nail juq bhai, ge daiq yaoq. ² Thailhai ngaol-a oq, uqhuq thaoq nail ilkhaol il ma nail khainl lavqkhoel jaoq jaoq dai jiav nail jaol duq* bhai neq, bhi jiav yaoq. Thaq tsa daiq. Khul khi mail dai ngal-aq neq, jaol duq al neq, yu nail jeq-e jaq-a nail aqlavq lavqkhoel bhai av bhiq-a nail ngaol. Aqyu juq mee q nail haol nail meenq bhai bhala liq tsel-nvq heeq bhee dai, ya naoqthaiq nail ngaol. ³ Ngaq nail salkhil khanq nail tsaol-aq nvq gaq bhai ngal bha qaoq bivq khi bhi lee naol. Aqyu nvq gaq daqiq doi-nq thaq khi, teevq hinl nvq yal kovq tsel n bhee dai, Miqyail nail daoq cavq bhiq nail ngaol” dai, ge lavq-a nail ngaol. ⁴ Aqyu nvq gaq neq, miltsaq bhai uvthaiq nail iqsanl nail Heeqphaq pevq nail gaq nail sivtavq bhai doevq nail saql oq aqbhaol nvq bhaol pevq nail nee ovqtavq, phalmanq nvq heeq iqsanl pevq nail ngaol. ⁵ Tsaol-aq teevq gaq ganav, aqyu nvq gaq bhai khoeq bhiq jiovq bhiq nail khi-u phao, aqyu nvq gaq nail moeqthaoq nee mail miqjaq dov lal khi, aqyu nvq gaq bhai neejiav jiav nail juq bhai poiv ha nail ngaol. Tsaol-aq teevq gaq ganav aqyu nvq gaq bhai khoeq bhiq jiovq bhiq nail

* **11:2** 11.2 Jaol duq dai ge nail neq, yu nail jeq-e jaq-a nail uqhuq thaoq nail jaol duq.

dai, laijai haq neq, alhai ya sil nail ngaol. ⁶ Aqyu nvq gaq Miqyail nail daoq cavq bhiq thailthaiq-u phao, maog-aol maq bhi aol lee dai, nqtavq bha lav tsoiq nia nail bhaqaoq, aqyu nvq gaq aol nail ngaol. Ulcuvq bhai aqsivq bhi pevq lal nia nail bhaqaoq iqsanl, aol nail ngaol. Aqyu nvq gaq khadai pov nl movq khi ngaol-aog, khoeq nail jiovq nail yaoq pha q yaoq-ao nee, miltsaq kovtavq bhai kev lee dai, nl nia nail bhaqaoq aol nail ngaol.

⁷ Aqyu nvq gaq salkhil khanq gaq haq neq, mao-ail navq nail khaqduq nee dov lal-a nail haqev nail jaiqyaq al maol, aqyu nvq gaq bhai genl dev nail ngaol. Aivq aqyu nvq gaq bhai genl dev nail gaq lai khi heivq nail ngaol. ⁸ Aqyu nvq gaq nail aqmaol bhai, meenq meenq ma nail gailkhaol bhai he ha-ai thaq nail ngaol. Meenq al meenq neq, aqyu nvq gaq nail Heeqphaq lavqyavq kovtavq bhai tavq heivq-a nail meenq ngaol. Aqhaqlal phao nee tsiqceiv dai haq neq, Saoldoq meenq khi mail lljiltuv milkhaoq ngaol.

⁹ Aq-u phao, khul pha q nail jeq-e lavqkhoel bhai aol nail tsaol-aq juq bhai maqkhaiq, jeq-e jaq-a iqsanl nail lavqkhoel bhai aol nail tsaol-aq juq maqkhaiq, daoq khul pha q ge nail tsaol-aq maqkhaiq, milkhaoq juq nail lavqkhoel bhai jaol nail tsaol-aq maqkhaiq, tsaol-aq niil juq neq, hail n ovqtavq, teevq pav aqyu nvq gaq nail aqmaol bhai heldaiq lal-a nail ngaol. Aqyu nvq gaq bhai maq bhi duqpheeq dai, lav tsoiq-a nail ngaol.

¹⁰ Aqyu nvq gaq sil-a nail ngel-i mail, miltsaq kovtavq bhai khal jaol nail tsaol-aq juq lavqkhiq tsail deede q khi bhaoqaiq lav sav-a nail ngaol.

Aqyu juq teevq gaq nee teevq gaq, kovpavq bivq nail ngaol. Khul khi mail dai ngal-aq neq, Miqyail nail haqbhoil gedan nail al nvq gaq neq, miltsaq kovtavq bhai jaol nail tsaol-aq yaq juq bhai haq dee aoq deedee nail phaqaq bhi kev lee-a nail ngaol.

¹¹ Thailhai ngaol-aq, hail n ovqtavq teevq pav bhee lal-u phao, Miqyail nee mail dov lee-a nail bhi doevq lal nia nail aqhaq aqyu nvq gaq nail lavqkhoel bhai aol lee khi, aqyu nvq gaq thul lal-a nail ngaol. A bhai ya moel-a nail juq geesil deedee lal bhiq-a nail ngaol. ¹² Aq-u phao, nqtavq nee mail aqthel meel dov-ai leevq khi, “Niilniai dav lal yaoq” dai, aqyu nvq gaq bhai khul nail bhai, aqyu nvq gaq ya gaiq-a nail ngaol. Aqyu nvq gaq, aqyu nvq gaq bhai neejiaj jiaj nail tsaol-aq nail sivtavq nee nqdil bhai jeeq khi nqtavq kovtavq bha dav lai-a nail bhai iqsanl aqyu juq ya moel-a nail ngaol.

¹³ Yanq al yanq nail lavqkhoel milluv luv deedee lal-a nail bhaqda nee meenq al meenq tsel bhoil nee teevq bhoil cov-ail khi, tsaol-aq sivq hinl gaq sil-a nail ngaol. Jail-ail ceevq-a nail tsaol-aq, geesil deedee lal bhiq khi, nqtavq kovtavq khe jaol nail Miqyail bhai tsiqeeq tsiqheel-a nail ngaol.

¹⁴ Geeqlaoq aqdoil nvq phaqaq teevq phaqaq gil-aq nail ngaol. Heldaiaq dei-eiq. Geeqlaoq aqdoil hail phaqaq teevq phaqaq lavqtsail mail kev lee nail ngaol.

Nqkho sivq laiq teevq laiq jüv nail ganl

15 A bhai nee ngal-aq, nqtavq gaqkhoel sivq gaq teevq gaq nqbho jiiiv-u phao, nqtavq nee mail kav deede nail aqthel niailhai meel dol leevq-a nail ngaol:

“Miltsaq bhai
uvthaiq nail bhaqaoq neq,
ngadao nail Heeqphaq Miqyail
khi mail aivq nail Khali nail
pevq lal-a nail ngaol.
Aivq neq, nqmaq maqluv
halyeel uvthaiq nail ngaol” dai,
meel dol leevq-a nail ngaol.

16 Aq-u phao, Miqyail nail sivtavq-ai yovqgavq nail doiqbev bev ma bhai yovqgavq jaoldeel-nvq thaq nail joiqmaq mavmaq nvq tsel liq gaq peevqceevq kovdoi q doiq nail lavqkhoel nee gaolbeiv khi, Miqyail bhai uqhuq thaoq thaoq-ail ge nail:

17 “Aq-u iqsanl,
niil aq-il iqsanl doevq khi,
iqsanl nail kovtavq bhai
uvthaiq nail bhaqaoq eeq nail
Heeqphaq Miqyail-ol,
eeq deede nail
naoq nail bhaqaoq oil khi
niil aq-il uvthaiq lee-aq nail
ngel-i mail,
naoq bhai tsiq eeq naol.

18 Milkhaoq yaq juq
neema phail lal khi,
naol iqsanl neema phail
deede lal-a nail ngaol.
Sil-a nail tsaol-aq bhai

yalkhaq dal nail aqyanq
 kev lee-aog nail ngaol.
 Naoq nail haqbhoil
 gedan nail yaqkav
 juq bhai maqkhaiq,
 naoq nail tsaol-aq
 juq bhai maqkhaiq,
 naoq nail aqmil bhai ev nail
 eeq yaq nil yaq
 iqsanl bhai maqkhaiq,
 geeqlaoq bivq nail aqyanq
 kev lee-aog nail ngaol.
 Miltsaq bhai
 lav cov-a nail juq bhai
 lav cov nail aqyanq iqsanl
 kev lee-aog nail ngaol” dai,
 ge nail ngaol.

¹⁹ A bhai nee ngal-aq, nqtavq bha jiaiv nail
 Miqyail nail uqhuq thaoq nail ilkhaol il ma phao
 lal khi, al nail lavqkhoel Miqyail nail daoqma
 saljial nail thunq ya moel-a nail ngaol. Aq-u
 phao, nqmeivq meivq nail phaqq khi, nqjaiq jaiq
 nail aqthel gaiq lee-a nail nee ovqtavq, milluv luv
 deedee khi, ollov aqheeq ga deedee nail niil juq
 pevq lal-a nail ngaol.

12

*Yaqmai-aq teevq gaq khi baivyaovq teevq maol
nail ganl*

¹ A bhai nee ngal-aq, bhi heeq bhi moel nail
 eeq deedee nail phaqq nqtavq bha, ngal ya moel-
 a nail ngaol. Yaqmai-aq teevq gaq nlma doi khi,

bhala bhai naoqthaiq-ai thaq nail ngaol. Aivq neq, aqgil tsel-nvq heel covq nail uqtsaoq tsaonq thaq nail ngaol. ² Yaqmai-aq al gaq yaqbeiv uvq thailthaiq nail ngaol. Aivq yaq tsiq nail dai khi, nal deedee nail ngel-i mail, gul thailthaiq nail ngaol. ³ Bhi heeq bhi moel nail yaoq phaqaq yaoq nqtavq bha, ngal gaoq ya moel-a nail ngaol. Neltsaiq deel baivyaovq maol ma teevq maol dov lee-a nail ngaol. Aivq neq, uqhuq sivq huq covq khi, uqkheel tsel kheel covq nail ngaol. Aivq nail uqhuq bhai heel uqtsaoq sivq tsaonq tsaonq thaq nail ngaol. ⁴ Aivq nail daoqmiq-i mail nqtavq bha jiav nail aqgil hail bhoil teevq bhoil bhai jiiqv jil khi, miltsaq kovtavq bhai liv bhoel-ai leevq-a ngaol. Yaq tsiq nail dai, lainq-ai thaq nail yaqmai-aq al gaq nail yaq doevq lee-u phao, yaq al gaq bhai ya jaq dai, baivyaovq al maol yaqmai-aq al gaq nail sivtavq bhai thulphaol-nvq thaq nail ngaol. ⁵ Yaqmai-aq al gaq yaqyov tsiq-a nail ngaol. Yaqyov niil gaq neq, yaqhao hail nail joiqniovq nee milkhaoq iqsanl bhai, uvthaiq nail gaq ngaol. Yaqyov al gaq bhai Miqyail jaol nail bha khi Miqyail nail joiqjaq doiqbev bev ma bhai teevq pov taivq-ail tsiq dal laivq-a nail ngaol. ⁶ Yaqmai-aq al gaq haqtsoiq haqyal bha tsaol-aivq-a nail ngaol. A bhai, teevq hinl nvq yal kovq tsel n bhee dai, aivq bhai heldaiq phail bhiq nail dai, Miqyail aivq nail haqbhoil jaol duq lav sav-ai thaq nail ngaol.

⁷ Aq-u phao, nqtavq kovtavq bhai genl genl ma dev nail thaiq lal-a nail ngaol. Milgeiqlal khi aivq nail nqtavq gaqkhoel juq baivyaovq al maol bhai dev pheeljaq-a nail ngaol. Baivyaovq al maol khi

aivq nail nqtavq gaqkhoel iqsanl, aqyu juq bhai genl dev lai-a nail ngaol. ⁸ Thailhai ngaol-aog, baivyaovq al maol khi aivq nail nqtavq gaqkhoel juq maq gaq lai-ail khi, aqyu juq nqtavq kovtavq bhai jaol duq maq jia v yaoq-aol. ⁹ Aq-u phao, neivq heeqphaq maq ngel haq neq, Saqdaq dai mil-ai thaq nail baivyaovq maol ma al maol bhai, miltsaq kovtavq bhai bavq ha-ai leevq-a nail ngaol. Aivq neq, milnee uqnee khe hageiv nail eellel al maol iqsanl, ngel nail ngaol. Aivq bhai miltsaq kovtavq bhai bavq ha-ai leevq-u phao, aivq nail nqtavq gaqkhoel bhai iqsanl, aivq nee mail teevq gaq khe-ai, bavq ha-ai leevq-a nail ngaol.

¹⁰ Nqtavq kovtavq bhai aqthel meel deedee nail bhai, ngal niailhai ya gaiq-a nail ngaol:
 “Niil aq-il ngadao nail Miqyail
 hevqkovq nail yanq
 kev lee-aog nail ngaol.
 Niil aq-il aivq bhaqaoq
 kav deedee nail lavqkhoel nee
 uvthaiq nail yanq
 kev lee-aog nail ngaol.
 Niil aq-il aivq nail Khali
 uvthaiq nail yanq
 kev lee-aog naol.
 Khul khi mail dai
 ngal-aq neq,
 Miqyail nail sivtavq bhai
 ngadao nail aqivq jaqbheq
 Khali yaq juq bhai
 nqkiv n-gaol maqkhaiq
 oeqbal thaq nail gaq bhai,

gaq lai-aog nail ngaol.

¹¹ Yaolyaq nail aqsivq
bhaqda nee maqkhaiq,
aqyu juq-i mail
salkhil khanq nail
bhaqda nee maqkhaiq,
aqyu juq oeqbal thaq nail
al gaq bhai

gaq lai-a nail ngaol.

Khul khi mail dai
ngal-aq neq,
aqyu juq neq,
al nail haqbhoil sil iqsanl,
sil tseq nail ngaol.

¹² Alheel ngel-i mail,
nqtavq khi mail
nqtavq kovtavq bhai
jaol nail juq-ol,
lavqkhiq tsail yaoq.
Thailhai ngaol-aog,
miltsaq khi iqyaq iqma neq,
geeqlaoq aqdoil ya nail ngaol.
Khul khi mail dai
ngal-aq neq,
neivq heeqphaq neq,
nuljuq nee mail
jaol nail ngaol.

Aivq nail haqbhoil aqyanq
micil maq ngel nail neq,
maq jiav yaoq-aol dai,
heeq nia nail ngel-i mail,
neema phail
deedee nail ngaol" dai,

ge nail bhai, ngal ya gaiq-a nail ngaol.

¹³ “Ngaq bhai miltsaq kovtavq bhai bavq ha-ai leevq thaq nail niil” dai, baivyaovq al maol heeq nia-u phao, yaqyov tsiq-a nail yaqmai-aq al gaq bhai khoeq bhiq jiovq bhiq nail khi the thailthaiq nail ngaol. ¹⁴ Yaqmai-aq al gaq, baivyaovq al maol nail aqlavq lavqkhoel bhai ya jel-ail dai, joelma maol ma nail aqdaol nvq daol ya-a nail ngaol. Aqdaol al-i mail haqtsoiq haqyal bha bhail-aivq khi, a bhai hail kovq ovqtavq teevq pav, Miqyail aivq bhai heldaiq phail bhiq-a nail ngaol. ¹⁵ Yaqmai-aq al gaq bhai bhi daq jal-aiq nail dai khi, baivyaovq al maol aivq nail moeqthaoq nee mail ulcuvq laoljaol jaol ma khe-ai yaqmai-aq al gaq nail haoqnaol phao peivq ha gaiq-a nail ngaol. ¹⁶ Thailhai ngaol-aog, miltsaq neq, yaqmai-aq al gaq bhai tsaojao-ai bhiq-a nail ngaol. Miltsaq pav lal khi, baivyaovq-i mail peivq ha-ai leevq-a nail ulcuvq al bhai suv gee gil-a nail ngaol. ¹⁷ Baivyaovq al maol, yaqmai-aq al gaq bhai neema phail deede lal bhiq khi, jaol-ail ceevq-a nail aivq nail yaq juq bhai genl dev ail-a nail ngaol. Yaq al juq neq, Miqyail-i mail bivq-a nail daoq bhai naldaiq khi, Yeiqsul nail ganl salkhil khanq nail tsaol-aq ngaol. ¹⁸ Baivyaovq al maol, iqyaq iqma nail daolbhaq haqaiq mildai daikhaoq bhai thulphaol-nvq thaq nail ngaol.

13

Iqyaq iqma khe haqev nail jaiqyaq teevq maol nail ganl

¹ Aq-u phao, iqyaaq iqma lavqkhoel nee mail haqev nail jaiqyaaq teevq maol dov lal nail bhai, ngal ya moel-a nail ngaol. Jaiqyaaq al maol neq, uqkheel tsel kheel covq khi, uqhuq sivq huq covq nail ngaol. Uqkheel al juq bhai heel uqtsaoq tsel tsaooq tsaooq-nq thaq nail ngaol. Al ovqtavq, Miqyail bhai khal ge movq-ail ge nail aqmil juq aivq nail uqhuq juq bhai, gevq thaq-ai thaq nail ngaol. ² Ngaq-i mail ya moel-a nail jaiqyaaq al maol neq, jaqlaq aqgevq khe-ai dul nail ngaol. Aivq nail aqkheil neq, aqoel nail aqkheil khe-ai dul khi, aivq nail moeqthaoq neq, allaqjaqsil nail moeqthaoq khe-ai dul nail ngaol. Baivyaovq al maol, jaiqyaaq al maol bhai bhaqaoq bivq khi, aivq nail doiqbev bev ma bhai jaoldeel nail aqkhaoqanq iqsanl bivq-a nail ngaol. ³ Haqev nail jaiqyaaq al maol nail uqhuq bhai neq, sil heeq pha-ail deeq pav-ai thaq nail bhai, ngal ya moel-a nail ngaol. Thailhai ngaol-aooq, malbavq al mee-ai lai-a nail ngaol. Miltsaq yaq iqsanl mail jaiqyaaq al maol bhai, noe-ai u maq dov dai pevq-ail khi, aivq nail haoqnao tsaoo-ai-a nail ngaol. ⁴ Haqev nail jaiqyaaq al maol bhai bhaqaoq bivq-a nail baivyaovq bhai, aqyu juq uqhuq thaooq-a nail ngaol. Al ovqtavq, aqyu juq haqev nail jaiqyaaq al maol bhai iqsanl uqhuq thaooq thaooq-ail khi ge nail: "Jaiqyaaq niil maol khe-ai khaq sil gaq dul nail-aiq. Khaq sil gaq aivq bhai genl dev tseq nail-aiq" dai, ge nail ngaol.

⁵ Haqev nail jaiqyaaq al maol neq, neema eeq nail heel nail daoq ge khi, Miqyail bhai khal ge movq-ail ge-a nail ngaol. Aivq bhai bhala liq tsel-nvq heeq bhee dai, bhi uvthaiq-

a nail ngaol. ⁶ Haqeiv nail jaiqyaq al maol Miqyail bhai maqkhaiq, Miqyail nail aqmil bhai maqkhaiq, Miqyail nail jaol duq bhai maqkhaiq, nqtavq kovtavq bhai jaol nail juq iqsanl bhai maqkhaiq, khal ge movq-ail ge-a nail ngaol. ⁷ Al ovqtavq, Miqyail nail tsaol-aq juq bhai genl dev gaq nia dai, aivq aqkhaoqanq ya-a nail ngaol. Khul phaqaq nail jeq-e bhai maqkhaiq, jeq-e jaq-a iqsanl bhai maqkhaiq, khul phaqaq nail daoq ge nail tsaol-aq juq bhai maqkhaiq, milkhaoq yaoq khaoq yaoq-ao nee bhai maqkhaiq, uvthaiq nail aqkhaoqanq iqsanl, ya-a nail ngaol. ⁸ Nqtavq khi mail miltsaq maq teivq-u nee mail, aqdoevq bhi doevq nail haoqgavq phaldoiq lavqkhoel bhai aqmil maq gevq bhoel-ai thaqaq nail tsaol-aq iqsanl mail, haqeiv nail jaiqyaq al maol bhai uqhuq thaqaq nail ngaol. Haoqgavq phaldoiq al doiq neq, deeq heivq nail bhai ya daq-a nail Yaolyaq nail haoqgavq phaldoiq ngaol.

⁹ Naqkhaol khal covq nail tsaol-aq, aqmeeq-ail naldaiq yaoq.

¹⁰ Yu bhai bhi
 pheel-aivq nail dai khi,
 doevq lee-a nail gaq neq,
 ya bhi pheel-aivq nail ngaol.
 Yu bhai thaoma-i mail
 bhi heivq nail dai khi,
 doevq lee-a nail gaq neq,
 thaoma-i mail heivq nail
 bhai ya daq nail ngaol.
 Ganl nil bhaqda nee,
 Miqyail nail tsaol-aq juq
 oltsaol khi

neema thaqtsaol lal nail
loq nail ngaol.

Miltsaq khe haqev nail jaiqyaq teevq maol nail ganl

¹¹ A bhai nee ngal-aq, miltsaq nee mail haqev nail jaiqyaq yaoq maol yaoq dov lal nail bhai, ngal ya moel-a nail ngaol. Jaiqyaq al maol neq, yaol yaq nail uqkheel khe-ai dul nail uqkheel covq nail ngaol. Thailhai ngaol-aq, baivyaovq khe-ai daoq ge nail ngaol. ¹² Haqev nail jaiqyaq nil maol neq, iqmoeq-u khe pov dov lal-a nail jaiqyaq al maol nail bhaqaoq aqsanl oil khi, aivq nail sivtavq bhai yuq-a nail ngaol. Jaiqyaq nil maol neq, sil nail bhai kev dai bhi deeq khi meeq lai-a nail jaiqyaq iqmoeq khe maol bhai, miltsaq yaq iqsanl mail uqhuq thaoq dai, nl-a nail ngaol. ¹³ Haqev nail jaiqyaq nvq maol teevq maol neq, bhi heeq bhi moel nail eeq nail pha q nl daiq bhiq-a nail ngaol. Tsaol-aq nail sivtavq bhai iqsanl nqtavq nee nail miltsaq bhai kev dai, migjaq bhi ga lee-a nail ngaol. ¹⁴ Jaiqyaq iqmoeq khe maol nail sivtavq bhai bhi heeq bhi moel nail mee nia pha q nl daiq bhiq nail bhaqaoq ya-ai tha q nail bhai juq khi, miltsaq kovtavq bhai khal jaol nail tsaol-aq iqsanl bhai hevq bheel-aivq a nail ngaol. “Thaoma-i mail bhi heivq khi ngaol-aq, maq sil dai doevq nail jaiqyaq iqmoeq khe al maol bhai, tha qeeq tha qheel nail lavqkheel, jaiqyaq al maol nail maolkhoel lav sav yaoq” dai, miltsaq yaq bhai jaiqyaq nvq maol teevq maol daoq bivq-a nail ngaol. ¹⁵ Haqev nail jaiqyaq iqmoeq khe maol nail maolkhoel al daoq ge nia

lal dai, bhi doevq lal nail bhaqaoq, jaiqyaq nvq maol teevq maol aivq ya-a nail ngaol. Maolkhoel al khoel bhai uqhuq maq thaoq nail tsaol-aq bhai, aivq heivq nail bhaqaoq iqsanl ya-a nail ngaol. ¹⁶ Eeq yaq nil yaq juq maqkhaiq, hulmeeq hulbhao juq maqkhaiq, haq nail aoq nail juq maqkhaiq, yaqkav juq maqkhaiq, yaqkav maq ngel nail juq maqkhaiq, lavqmal lavq bhai maq ngel haq neq, neeqthel bhai haqev nail jaiqyaq niil maol-i mail junq ya deeq naol dai, ge nail khe-ai, maq deeq dai, teevq gaq-ail maq jel-ail nia-ail. ¹⁷ Junq maq deeq-ai thaq nail tsaol-aq teevq gaq iqsanl, yalkav maq ya gaoq maq ya ul dai, haqev nail jaiqyaq niil maol lav sav-ai thaq nail ngaol. Junq deeq-ai thaq nail al neq, haqev nail jaiqyaq niil maol nail aqmil maq ngel haq neq, aivq nail nanqpav ngaol.

¹⁸ Ganl niil heeq kivq dai, neenoeq neekha ya aol nail ngaol. Noeq heeq noeq dov nia nail tsaol-aq neq, haqev nail jaiqyaq niil maol nail nanqpav bhai saol-nvq nia nail ngaol. Aivq nail nanqpav neq, tsaol-aq nail nanqpav ngaol. Nanqpav al neq, kovq yal kovq tsel kovq ngaol.

14

Teevq sainv liq meel-nvq liq hinl gaq tsiqeeq nail daoqsel gul nail ganl

¹ Ngal heldaiq gai-aivq-u phao, Yaolyaq Yeel-ovq gaoqjaoq bhai thulphaol-nvq thaq nail bhai, ya moel-a nail ngaol. Yaolyaq nee mail tsaol-aq teevq sainv liq meel-nvq liq hinl gaq thulphaol-nvq thaq nail ngaol. Aqyu juq nail neeqthel

bhai Yaolyaq nail aqmil khi aivq nail Aqhbhu nail aqmil gevq-ai thaq nail ngaol. ² Aqthel mao-ail meel nail laoljaol khe-ai meel nail aqthel khi, kav deede nail nqjaiq jaiq nail aqthel khe-ai, nqtavq kovtavq nee aqthel meel dol leevq nail bhai, ngal ya gaiq-a nail ngaol. Aqthel al neq, dil-nvq deeq nail tsaol-aq dil-nvq deeq nail aqthel khe-ai dul nail ngaol. ³ Aqyu neq, doiqbev bev ma nail sivtavq bhai maqkhaiq, aqdoevq pha q liq maol khi joiqmaoq mavmaoq al juq nail sivtavq bhai maqkhaiq, daoq aqsivq pha q nee daoqsel gul thailthaiq nail ngaol. Miltsaq kovtavq nail lavqkhoel khe ul kovq-ai thaq nail tsaol-aq al teevq sainv liq meel-nvq liq hinl gaq maq ngel nail neq, daoq aqsivq pha q nee daoqsel gul nail al, teevq gaq-ail maq gul nia-ail. ⁴ Tsaol-aq al juq neq, yaqmai-aq juq nee mail maq bheeq maq leel daiq-al. Aqyu juq neq, aqhaol haol dai doevq nail yaqyov-aq juq ngaol. Aqyu juq neq, Yaolyaq khal tsao nail bhai tsaothe jaol nail ngaol. Miqyail khi Yaolyaq nail haqbhoil iqmoeq heeq lee-a nail aqheeq pevq lal dai, aqyu juq bhai tsaol-aq yaq nail lavqkhoel nee ul kovq-ai thaq nail ngaol. ⁵ Aqyu juq nail moeqthaoq lavqkhoel-ai goiqbhaoq bhaoq nail pha q teevq peivq-ail maq aol-ail, oeqbal tha q duq iqsanl maq jia-v-ail.

Nqtavq gaqkhoel hail gaq nail ganl

⁶ Aq-u phao, nqtavq nail gaoltsi bhai nqtavq gaqkhoel teevq gaq bhail nail bhai, ngal ya moel-a nail ngaol. Aivq neq, milkhaoq yaoq khaoq yaoq-ao nee bhai maqkhaiq, jeq-e jaq-a iqsanl

bhai maqkhaiq, khul pha q nail dao q ge nail tsaol-aq bhai maqkhaiq, miltsaq kovtavq bhai jaol nail tsaol-aq iqsanl bhai cavq bhiq nail dai khi, nqmaq maqluv halyeel ivq nail lavqkhiq tsail nail geeqlaoq dao q phi-nq tha q nail ngaol. ⁷ Aivq mailma-ail aqthel gul kav khi ge nail: “Miqyail bhai geesil khi, aivq bhai ev yaoq. Aivq yalkhaq dal nail aqyanq kev lee-aoq nail ngaol. Nqtavq kovtavq khi miltsaq bhai maqkhaiq, iqyaq iqma khi ulcuvq eelbev dov duq bhai maqkhaiq, al juq bhai teivq-a nail gaq bhai uqhuq tha oq yaoq” dai, gul-a nail ngaol.

⁸ Nqtavq gaqkhoel nvq gaq teevq gaq, iqmoeq khe gaq nail haoqnao tsaothe tsaothe-ail khi ge nail: “Aqmil dov nail Bhaqbhulloq meenq ga peiv gil-ail nail ngaol. Ga peiv gil-ail nail ngaol. Khul khi mail dai ngal-aq neq, meenq al meenq khaqmiq sev dai, jeq-e jaq-a iqsanl bhai jilphee q bhi daol-a nail ngaol” dai, gul-a nail ngaol.

⁹ Nqtavq gaqkhoel hail gaq teevq gaq, al nvq gaq nail haoqnao tsaothe tsaothe-ail, aqthel gul kav khi ge nail: “Haqev nail jaiqyaq al maol khi aivq nail maol khoel bhai uqhuq tha oq khi, yovqgavq nail neeqthel bhai maqkhaiq, yovqgavq nail aqlavq bhai maqkhaiq, jaiqyaq al maol nail junq deeq-ai tha q nail khul gaq bhai maqkhaiq, ¹⁰ khaoqanq bhai hoel bhoel-ai tha q nail Miqyail nail neema phail nail aqhee q tsilju nail ullul ya daol nail ngaol. Meeq nail haol nail nqtavq gaqkhoel nail sivtavq bhai maqkhaiq, Yaolyaq nail sivtavq bhai maqkhaiq, miqjaq khi miqjal jalheel-i mail, tsaol-aq al juq bhai khoeq dee jiovq deede bhiq nail ngaol. ¹¹ Aqyu juq

bhai khoeq bhiq jiovq bhiq-u phao, dov lal-a nail miqkhoiq al neq, nqmaq maqluv halyeel dav lai nail ngaol. Hageiv nail jaiqyaq al maol khi aivq nail maolkhoel bhai uqhuq thaoq khi, aivq nail aqmil-i mail, junq deeq-ai thaq nail tsaol-aq, nqkiv n-gaol maqkhaiq, gaqnaq maq ya naq-ail. ¹² Alheel ngel-i mail, Miqyail-i mail bivq-a nail daoq naldaiq khi Yeiqsul bhai neema thaqtsoal nail Miqyail nail tsaol-aq juq, oltsaol nail phaqq loq nail ngaol” dai, ge nail ngaol.

¹³ Aq-u phao, nqtavq nee mail aqthel meel dov-ai leevq nail bhai, ngal niailhai ya gaiq-a nail ngaol: “Niailhai gevq yaoq. Niai nee pultavq, Yeiqsul nail lavqkhoel bhai sil-a tsaol-aq geeqlaoq eeq nail ngaol.” Aqhaqlal Miqyail iqsanl ge nail: “Ngel naol. Aqyu juq ganl nl doil hal doil khi gaqnaq ya naq nail ngaol. Khul khi mail dai ngal-aq neq, aqyu juq-i mail nl-a hal-a nail phaqq bhai, Miqyail maq nioilpeivq-ail” dai, ge nail ngaol.

Miltsaq kovtavq-ai gov gaiq nail ganl

¹⁴ Ngal heldaiq gai-aivq-u phao, phulleq deel nqdil bhai ya moel-a nail ngaol. Tsaol-aq nail Yaqyov khe-ai dul nail teevq gaq, nqdil al bhai jaoldeel-nvq thaq nail ngaol. Aivq neq, heel uqt-saoq tsaoq khi, gaiqaoq aqtav teevq keiv nieivq thaiq-ai thaq nail ngaol. ¹⁵ Nqtavq gaqkhoel yaoq gaq yaoq, uqhuq thaoq nail ilkhaol il ma nee dov lee khi, nqdil bhai jaoldeel-nvq thaq nail al gaq bhai gul gul-ail khi ge bhiq nail: “Miltsaq kovtavq-ai gov mi lal-aoq thaq nial. Gov gaiq mao lal-aoq thaq nail ngel-i mail, gaiqaoq oil khi

gaiq ail yaoq” dai, ge bhiq-a nail ngaol. ¹⁶ Aq-u phao, nqdil bhai jaoldeel-nvq thaq nail al gaq, aivq nail gaiqaoq-i mail miltsaq kovtavq khe gov iqsanl bhai, lav leel khi gaiq gil-a nail ngaol.

¹⁷ Nqtavq gaqkhoel yaoq gaq yaoq, nqtavq kovtavq khe uqhuq thaog nail ilkhaol il ma nee dov lee-a nail ngaol. Aivq iqsanl, gaiqaoq aqtav teevq keiv aol nail ngaol. ¹⁸ Aq-u phao, miqjaq nail kovtavq-ai bhaqaoq jiaiv nail nqtavq gaqkhoel teevq gaq laol duq nee dov lee khi, gaiqaoq aqtav aol nail al gaq bhai gul gul-ail khi ge bhiq nail: “Gaiqaoq aqtav oil khi, miltsaq kovtavq khe aqheeq tsil juq nail dailphul bhai gaiq yaoq. Khul khi mail dai ngal-aq neq, aqheeq tsil juq aqheeq mi lal-aoq thaq nial” dai, ge bhiq-a nail ngaol. ¹⁹ Nqtavq gaqkhoel al gaq, aivq nail gaiqaoq-i mail miltsaq kovtavq khe aqheeq tsilju aqheeq iqsanl bhai, gaiq gil gaq-al ngal-aq neq, aqheeq tsilju nail ullul naoq dov duq bhai hoel bhoel-a nail ngaol. Aqheeq tsilju nail ullul naoq dov duq al neq, Miqyail neema phail nail pha q pevq nail ngaol. ²⁰ Aqheeq tsilju nail ullul naoq dov duq al bhai, meenq meenq jail bhai naoq naoq-ail naoq dol-aivq-u phao, aqsivq dov lee-a nail ngaol. Aqsivq al neq, nvq yal lal kev dai deq khi, moeqphaq nail moeqkeivq bhai kev dai, navq nail ngaol.

15

Khoeq nail jiovg nail sivq pha q khi nqtavq gaqkhoel sivq gaq nail ganl

¹ Aq-u phao, noeq-u maq dov nail bhi heeq bhi moel nail eeq nail pha q nqtavq bha, ngal ya moel-a nail ngaol. Bhi heeq bhi moel nail al pha q neq, khoeq nail jiovq nail sivq pha q aol nail nqtavq gaqkhoel sivq gaq ngaol. Khoeq nail jiovq nail al juq neq, haoqnao naosaq khe juq ngaol. Al juq gil haq neq, Miqyail neema phail nail pha q gil-aoq nail ngaol. ² A bhai nee ngal-aq, miqjaq khi ulcuvq lav kheq-ai tha q nail phaoqdaiq nail ngaqkha khe-ai dul lai nail teevq pha q bhai, ngal ya moel-a nail ngaol. Haqev nail jaiqyaq al maol bhai maqkhaiq, aivq nail maolkhoel bhai maqkhaiq, aivq nail nanqpav bhai maqkhaiq, gaq lai nail tsaol-aq juq Miqyail nail dil-nvq bavq khi, ngaqkha al kha nail jail-nq bhai thulphaol-nvq tha q nail ngaol. ³ Aqyu juq Miqyail nail yaqkav Molsei q nail daoqsel khi mail Yaolyaq nail daoqsel gul gul-ail khi ge nail:

“Iqsanl nail kovtavq bhai
 uvthai q nail bhaqaoq eeq nail
 Heeqphaq Miqyail-ol,
 naoq-i mail nl-a
 hal-a nail pha q neq,
 eeq dee heel
 deede nail ngaol.
 Jeq-e jaq-a
 iqsanl nail Heeqphaq-ol,
 naoq nail gailkhaol neq,
 tsaq dee daol deede nail ngaol.
⁴ Heeqphaq Miqyail-ol,
 naoq bhai maq geesil dai,
 naoq nail aqmil bhai
 maq tsiqeeq nail

khaq sil gaq jaol nail-aiq.
 Khul khi mail dai
 ngal-aq neq,
 naol teevq gaq taivq-ail
 meeq nail haol nail ngaol.
 Jeq-e jaq-a iqsanl mail
 naol jaol nail bha lal khi,
 naoq bhai uqhuq
 thaoq lal nail ngaol.
 Khul khi mail dai
 ngal-aq neq,
 naoq-i mail aqtsaq aqdaol dai
 nl-a hal-a nail juq,
 bhaqlaoq kheq dai,
 dov lal-a nail ngaol” dai,
 ge bhiq-a nail ngaol.

⁵ A bhai nee ngal-aq, ngal heldaiq gai-aivq-u phao, salkhil pevq nail uqhuq thaoq nail ilkhaol il ma nqtavq kovtavq bhai phao-ai thaq nail bhai, ya moel-a nail ngaol. Uqhuq thaoq nail ilkhaol il ma al neq, haqphal saiqgov gov ma ngaol.

⁶ Khoeq nail jiovg nail sivq pha qol nail nqtavq gaqkhoel sivq gaq uqhuq thaoq nail ilkhaol il ma al il nee dov lee-a nail ngaol. Aqyu juq neq, haoltaiv deel haqphal aqphul doi-nq thaq nail ngaol. Aqyu juq nail neema bhai heel nail jiovgpavq pavq-nvq thaq nail ngaol. ⁷ Aqdoevq pha q al liq maol nail lavqkhoel khe teevq maol neq, nqtavq gaqkhoel sivq gaq bhai teevq gaq-ai, heel nail iqldaoq teevq heeq tsiq bhiq-a nail ngaol. Heel iqldaoq al juq nail lavqkhoel bhai nqmaq maqluv halyeel doevq nail Miqyail nail neema

phail nail phaḡ, teevḡ bhee aol nail ngaol. ⁸ Aḡ-u phao, Miḡyail nail seiḡleiḡ khaoḡsail khi mail aivḡ nail bhaḡaoḡ bhaḡda nee, uḡhuḡ thaoḡ nail ilkhaol il ma al il nail lavḡkhoel, miḡkhoiḡ teevḡ bhee aol nail ngaol. Nḡtavḡ ḡaḡkhoel al sivḡ ḡaḡ nail khoeḡ nail jioḡvḡ nail sivḡ phaḡ maḡ gil-u kev dai, tsaol-aḡ teevḡ ḡaḡ iqsanl, uḡhuḡ thaoḡ nail ilkhaol il ma al il bhai maḡ aol lai nia-ail.

16

Miḡyail nail neema phail nail phaḡ aol nail iḡlaoḡ sivḡ heeḡ nail ḡanl

¹ A bhai nee ngal-aḡ, uḡhuḡ thaoḡ nail ilkhaol il ma al il nail lavḡkhoel nee kav deedeē nail aḡthel niailhai ḡul dov-ai leevḡ-a nail bhai, ngal ya ḡaiḡ-a nail ngaol. “Miḡyail neema phail nail phaḡ aol nail iḡlaoḡ sivḡ heeḡ bhai miltsaḡ kovtavḡ bhai hoeldav ail bhiḡ yaoḡ” dai, nḡtavḡ ḡaḡkhoel al sivḡ ḡaḡ bhai, ḡe bhiḡ-a nail ngaol. ² A bhai nee ngal-aḡ, nḡtavḡ ḡaḡkhoel iqmoēḡ khe ḡaḡ aivḡ nail iḡlaoḡ miltsaḡ kovtavḡ bhai hoeldav ail-a nail ngaol. Aḡ-u phao, haḡeiv nail jaiḡyaḡ al maol-i mail junḡ deēḡ-ai thaḡ nail juḡ khi mail, aivḡ nail maolkhoel bhai uḡhuḡ thaoḡ nail tsaol-aḡ juḡ neḡ, doil deedeē nail malyal daol lal bhiḡ-a nail ngaol.

³ Nḡtavḡ ḡaḡkhoel nvḡ ḡaḡ teevḡ ḡaḡ iqsanl, aivḡ nail iḡlaoḡ iḡyaḡ iqma bhai hoel puvḡ-a nail ngaol. Aḡ-u phao, iḡyaḡ iqma neḡ, sil-ai thaḡ nail tsaol-aḡ nail aḡsivḡ khe-ai pevḡ lal khi, iḡyaḡ iqma lavḡkhoel khe khal doevḡ nail phaḡ iqsanl mail, sil gil-a nail ngaol.

⁴ Nqtavq gaqkhoel hail gaq teevq gaq, aivq nail iqlaoq laoljaol juq khi mail ulcuvq eelbev juq bhai hoel bhoel gai-aivq-u phao, ulcuvq al juq aqsivq pevq-ail gil-a nail ngaol. ⁵ Aq-u phao, ulcuvq bhai heldaiq nail nqtavq gaqkhoel al gaq niailhai ge nail ngaol:

“Aq-u iqsanl,
niil aq-il iqsanl,
doevq nail
meeq nail haol nail gaq-ol,
naol tsaol-aq al juq bhai
niailhai yalkhaq dal nail neq,
tsaq nail daol nail ngaol.

⁶ Aqyu juq neq,
Miqyail nail tsaol-aq juq nail
aqsivq khi mail,
naoq nail haqbhoil gedan nail
juq nail aqsivq
bhi dov lee-a nail ngel-i mail,
naol aqyu juq bhai aqsivq
bhi daol-a nail ngaol.

Aqyu juq alhai
ya daq nail neq,
tsaq nail ngaol” dai,
ge nail bhai, ngal ya gaiq-a nail ngaol.

⁷ Al ovqtavq, laol duq nee mail aqthel meel dol leevq khi ge nail:

“Ngel naol.
Iqsanl nail kovtavq bhai
uvthaiq nail bhaqaoq eeq nail
Heeqphaq Miqyail-ol,
naol yalkhaq dal nail neq,
maldil tsaq nail

daol nail ngaol” dai,

ge nail bhai ngal ya gaiq-a nail ngaol.

⁸ A bhai nee ngal-aq, nqtavq gaqkhoel liq gaq teevq gaq, aivq nail iqiaoq nlma bhai hoel dav-a nail ngaol. Aq-u phao, nlma nail miqjaq al, tsaol-aq yaq bhai bhi laol lal nail aqkhaoqanq ya-a nail ngaol. ⁹ Aqlaol haquvq khi laol deedee nail al, tsaol-aq yaq bhai bhi poiv khul laivq nail ngaol. Thailhai ngaol-aog, khoeq nail jiovg nail niil juq nail kovtavq bhai bhaqaoq jiav nail Miqyail bhai, aqyu juq iqkhail yavq-a nail ngaol. Aqyu juq oeqbal maq noeq pov nail nee ovqtavq, Miqyail bhai maq tsiqeeq maq tsiqheel-ail.

¹⁰ A bhai nee ngal-aq, nqtavq gaqkhoel ngaq gaq teevq gaq aivq nail iqiaoq haqev nail jaiqyaq al maol nail doiqbev bev ma bhai, hoel dav-a nail ngaol. Aq-u phao, haqev nail jaiqyaq al maol-i mail uvthaiq-ai thaq nail milkhaoq navtsee dai, pevq-ail khi, a bhai jaol nail tsaol-aq juq nal deedee nail ngel-i mail, moeqlal bhai keivq thaiq-ai thaq nail ngaol. ¹¹ Aqyu juq nal dee goel deedee nail pha q bhai maqkhaiq, malyal daol nail pha q bhai maqkhaiq, ya daq-a nail ngel-i mail, nqtavq kovtavq bhai jaol nail Miqyail bhai aqyu juq iqkhail yavq-a nail ngaol. Al ovqtavq, aqyu juq-i mail nl laiq hal laiq-a nail pha q bhai neq, maq noeq pov maq noeqphal-al.

¹² Nqtavq gaqkhoel kovq gaq teevq gaq, aivq nail heel iqiaoq Ulbhaqlal nail laoljaol jaol ma bhai hoel puvq-a nail ngaol. Aq-u phao, nlma dovkhoeq phao jaol nail heeqphaq juq nail haqbhoil gailkhaol daol lal dai, laoljaol al jaol sivq ail-a nail ngaol. ¹³ Aq-u phao, baivyaovq

nail moeqthaoq lavqkhoel nee maqkhaiq, haqev nail jaiqyaq al maol nail moeqthaoq lavqkhoel nee maqkhaiq, Miqyail nail haqbhoil gedan naol dai, ge khi ngaol-aog, maldil maq ngel nail gaq nail moeqthaoq lavqkhoel nee maqkhaiq, neivq aqcavq hail maol dov lee nail bhai, ngal ya moel-a nail ngaol. Neivq al hail maol neq, phaqaq khe-ai dul lai nail ngaol. ¹⁴ Neivq al hail maol neq, bhi heeq bhi moel nail phaqaq nl daiq bhiq nail neivq al juq nail aqheel ngaol. Aqyu juq neq, Iqsanl nail kovtavq bhai uvthaiq nail bhaqaog eeq nail Miqyail nail aqn n-gaol, genl dev nail haqbhoil, miltsaq doi dai jaol nail, heeqphaq juq bhai bhi jil lal nail dai khi, neivq al juq dov lee-a nail ngaol.

¹⁵ Yeiqsul ge nail: “Naldaiq yaoq. Khoiqbhaoq bhaoq lee nail khe-ai, ngal lee naol dei-eiq. Aqgeel geel dai jaol khi, yovqgavq nail aqgaq aqdoi bhai heldaiq phail khi doi-nq thaqaq nail tsaol-aq neq, geeqlaoq eeq nail ngaol. Tsaol-aq maoldeq laqnel-ail maq jaol nail ngel-i mail, yu nail sivtavq bhai maq ya haqsil-ail” dai, ge bhiq-a nail ngaol.

¹⁶ Neivq al hail maol neq, heeqphaq juq bhai, Aqmaqgeiqdoq dai khul nail dao bhai bhi jil lal-a nail ngaol. Aqmil al neq, Heiqbhail daoq ngaol.

¹⁷ Nqtavq gaqkhoel sivq gaq teevq gaq, aivq nail iqiaoq lilmoel nail lavqkhoel bhai thaoq ha gai-aivq-a nail ngaol. Aq-u phao, uqhuq thaoq nail ilkhaol il ma lavqkhoel bhai jiav nail joiqjaq doiqbev bev ma nee mail kav deede nail aqthel, “Gil-aog naol” dai, gul dol-ai leevq-a nail ngaol.

¹⁸ Aq-u phao, nqmeivq meivq lal khi nqjaiq jaiq

nail aqthel mee nia phaḡ khi mail milluv luv deedeē nail niil juḡ, pevḡ lal-a nail ngaol. Tsaol-aḡ yaḡ bhai teivḡ-u n-gaol nee yanḡgaol kev dai, niidai dai-ail milluv teevḡ pov iḡsanl, maḡ luv lal daiḡ haḡ-al. ¹⁹ Meenḡ meenḡ ma al meenḡ hail pav pav ail-a nail ngaol. Milkhaḡ yaḡḡ khaḡḡ yaḡḡ-ao nee nail lavḡḡkhoaḡ bhai jiaḡ nail meenḡ juḡ iḡsanl, cov-ail gil-a nail ngaol. Miḡyail neḡ, aivḡ neema phaḡl deedeē nail aḡheeq tsilju nail ullul deḡ nail khaḡḡḡḡḡ, aḡmil dov nail Bhaḡḡbhulloḡ meenḡ bhai bhi pevḡḡ gil-ail khi, teevḡ thal-iḡ maḡ nioilpeivḡ-ail. ²⁰ Eeljaol laol-n iḡsanl mail pevḡḡ-ail gil khi, gaoḡjaḡḡ iḡsanl teevḡ thal-iḡ maḡ jiaḡ yaḡḡ-aol. ²¹ Hail tsel jao-ai jaiḡ dai bhee nail ollov aḡheeq nee mail tsaol-aḡ yaḡ nail kovtavḡ bhai ga lee-a nail ngaol. Miḡyail aḡyu juḡ bhai ollov aḡheeq bhi ga bav bhi ga bav-ail, khaḡḡ bhiḡ jioḡḡ bhiḡ-a nail ngel-i nail, aḡyu juḡ Miḡyail bhai iqkhail yavḡ-a nail ngaol. Khul khi mail dai ngal-aḡ neḡ, khaḡḡḡ nail jioḡḡḡ nail al phaḡ neḡ, haḡ deedeē nail ngaol.

17

Mao-ail eeḡ nail maimaḡḡlal gaḡ bhai yalkhaḡ dal-a nail ganl

¹ Aḡ-u phao, heel iqḡlaḡḡ sivḡ heeḡ aol nail nḡtavḡḡ gaḡḡkhoaḡḡ sivḡ gaḡ nail lavḡḡkhoaḡḡ khaḡ teevḡḡ gaḡ lee khi, “Lal yaḡḡ. Ulcuvḡ maodai nail kovtavḡḡ-ai jaoldeel-nvḡḡ thaḡḡ nail mao-ail eeḡ nail maimaḡḡlal gaḡḡ bhai yalkhaḡḡ dal bhiḡ thailthaiḡḡ nail, ngal naḡḡḡ bhai cavḡḡ naḡḡ lavḡḡḡ bheḡ. ² Miltsaḡḡ kovtavḡḡḡ khaḡḡ jaol nail heeḡḡphaḡḡ

juq aivq nee mail bheeq-a nail ngaol. Miltsaq yaq juq iqsanl mail khaqmiq sev dai, aivq nail jilpheed daol bol laivq thaq nail ngaol” dai, ngaq bhai ge lavq-a nail ngaol.

³ A bhai nee ngal-aq, nqtavq gaqkhoel al gaq ngaq bhai, Aqhaqlal Miqyail nail lavqkhoel nee tsaol-aq maq jaol nail haqtsoiq haqyal bhai hel-aivq lavq-a nail ngaol. A bhai yaqmai-aq teevq gaq haqev nail jaiqyaq neltsaiq deel teevq maol bhai jeeq-nq thaq nail bhai, ngal yaq moel-a nail ngaol. Haqev nail jaiqyaq al maol neq, uqhuq sivq huq khi uqkheel tsel kheel covq nail ngaol. Aqmaol maol lao-ail Miqyail bhai khal ge movq-ail ge nail aqmil juq, gevq-ai thaq nail ngaol.

⁴ Yaqmai-aq al gaq neq, nel nav nav nail khi neltsaiq deel aqgaq aqdoi doi-nq khi, heel sainl khi laoqpav laolpav nail sainl goe-nq thaq nail ngaol. Aivq neq, yu nee mail bheeq nail leel nail bhai tavq lai nail aqjiivq aqcavq phaqa khi maq heldaiq nul nail phaqa teevq bhee aol nail heel maiqgaog tsiq-nq thaq nail ngaol. ⁵ Aivq nail neeqthel bhai oil-uvq-ai thaq nail daoqceevq bhao nail aqmil niailhai gevq-ai thaq nail ngaol: “aqmil dov nail

Bhaqbhulloq meenq neq,
maimaqlal juq nail
aqma pevq khi
miltsaq kovtavq khe
aqjiivq aqcavq juq nail
aqma ngaol” dai,
gevq-ai thaq nail ngaol.

⁶ Yaqmai-aq al gaq, Miqyail nail tsaol-aq juq nail aqsivq maqkhaiq, Yeiqsul nail haqbhoil

salkhil khanq nail juq nail aqsivq maqkhaiq daol bov-a nail bhai, ngal ya moel-a nail ngaol. Ngal aivq bhai ya moel-u phao, noeq-u maq dov dai, pevq ail-a nail ngaol. ⁷ Aq-u phao, nqtavq gaqkhoel al gaq ngaq bhai ge lavq-a nail: “Naol khul khi noeq-u maq dov dai, pevq ail nail-aiq. Yaqmai-aq al gaq nail ganl maqkhaiq, uqhuq sivq huq khi uqkheel tsel kheel nail ganl maqkhaiq, aivq-i mail jeeq-nq thaq nail haqev nail jaiqyaq al maol nail ganl maqkhaiq, oil tsail-ai thaq nail al, ngal naoq bhai ge daiq lavq bhel dei-eiq. ⁸ Naoq-i mail moel thailthaiq nail haqev nail jaiq yaq al maol neq, milnee uqnee jaol khi ngaol-aq niil aq-il maq jaol yaoq-aol. Aivq neq, mao-ail maq maoq lal mail, mao-ail navq nail khaqduq nee dov lal khi ngaol-aq, ya luq ya seil-ail nail ngaol. Nqtavq khi miltsaq teivq-u nee mail, aqdoevq bhi doevq nail haoqgavq phaldoiq lavqkhoel-ai aqmil maq gevq bhoel-ai thaq nail miltsaq kovtavq bhai jaol nail tsaol-aq, haqev nail jaiqyaq al maol bhai ya moel-u phao, noeq-u maq dov dai, pevq-ail nail ngaol. Khul khi mail dai ngal-aq neq, milnee uqnee jaol khi ngaol-aq, niil aq-il maq jaol mail, yaqhao gaoq jaol lal nail ngel-i mail ngaol.

⁹ Ganl niil heeq kivq dai, neenoeq neekha ya aol nail ngaol. Uqhuq al sivq huq neq, yaqmai-aq al gaq-i mail jaoldeel-nvq thaq nail gaoqjaoq sivq jaoq ngaol. Heeqphaq sivq gaq iqsanl ngel nail ngaol. ¹⁰ Thailhai ngaol-aq, ngaq gaq neq, sil-aq nail ngaol. Teevq gaq neq, niil aq-il uvthaiq thailthaiq nail ngaol. Teevq gaq neq, maq dov lal haq-al. Aivq dov lal-u phao, teevq yanq taivq-ail

ya jaol-ail teevq-eel ngaol. ¹¹ Milnee uqnee jaol khi ngaol-aog, niil aq-il maq jaol nail, haqev nail jaiqyaq al maol neq, eivq gaq teevq gaq ngaol. Aivq neq, al sivq gaq bhai tavq nail ngaol. Aivq iqsanl, ya luq ya seil-ail nail ngaol.

¹² Naoq-i mail ya moel-a nail uqkheel al tsel kheel neq, milkhaoq bhai maq ya uvthaiq haq nail heeqphaq tsel gaq ngaol. Aqyu juq neq, haqev nail jaiqyaq al maol nee mail naqli teevq lavq bhee dai, heeqphaq nail alyaq ya nail ngaol.

¹³ Heeqphaq al juq, neema teevq heeq taivq-ail tavq khi, haqev nail jaiqyaq al maol nail aqlavq lavqkhoel-ai yovqgavq nail bhaqaoq khi yovqgavq nail alyaq av bhiq nail ngaol. ¹⁴ Aqyu juq Yaolyaq bhai genl dev nail ngaol. Dev-u phao, Yaolyaq aqyu juq bhai dev gaq nail ngaol. Khul khi mail dai ngal-aq neq, aivq neq, uvthaiq nail juq nail kovtavq bhai uvthaiq nail gaq pevq khi, heeqphaq nail kovtavq bhai heeqphaq iqsanl, pevq nail ngaol. Aivq nee mail jaol nail tsaol-aq juq neq, khul-ai thaq nail tsaol-aq, tsel dov-ai thaq nail tsaol-aq khi, saljial ivq nail tsaol-aq neq, aivq nee mail teevq gaq khe-ai gaq lai nail ngaol” dai, ngaq bhai ge lavq-a nail ngaol.

¹⁵ Nqtavq gaqkhoel al gaq ngaq bhai teevq pov gaoq ge lavq-a nail: “Naoq-i mail ya moel-a nail maimaqlal al gaq-i mail jaoldeel-nvq thaq nail ulcuvq al neq, jeq-e jaq-a juq, tsaol-aq munl munl ma juq, milkhaoq juq khi daoq mee nia pha q ge nail tsaol-aq juq ngaol. ¹⁶ Naoq-i mail ya moel-a nail uqkheel al tsel kheel khi haqev nail jaiqyaq al maol neq, maimaqlal al gaq bhai neejlav jiav lal nail ngaol. Aqyu juq aivq khe

khal jiaiv nail iqsanl bhai oil gil bhiq khi, maoldeq lavqnel-ail bhi jaol nail ngaol. Aqyu juq aivq nail haqjoil jaq khi, aivq bhai miqjaq-i mail kheqpoiv nail ngaol. ¹⁷ Khul khi mail ngal-aq neq, aqyu juq Miqyail neema tsaq nail khe-ai nl lal dai, Miqyail aqyu juq nail neema bhai bhi noeq dov-a nail ngaol. Bhi noeq dov-a nail al neq, aivq nail daoq bhee lal-u phao kev dai, neema teevq heeq taivq-ail tavq tavq-ail, haqev nail jaiqyaq al maol nail aqlavq lavqkhoel-ai yovqgavq nail aqyaq yovqgavq av bhiq-a nail ngaol. ¹⁸ Naoq-i mail ya moel-a nail yaqmai-aq al gaq neq, miltsaq kovtavq khe heeqphaq juq bhai uvthaiq nail meenq meenq ma ngaol” dai, ge lavq-a nail ngaol.

18

Bhaqbhulloq meenq peiv ail-a nail ganl

¹ A bhai nee ngal-aq, nqtavq gaqkhoel yaoq gaq yaoq nqtavq nee mail yavq kha lee thailthaiq nail bhai, ngal ya moel-a nail ngaol. Aivq neq, eeq deedee nail bhaqaoq aol khi, aivq nail seiqlaiq khaoqsail bhaqda nee miltsaq kovtavq bhai aqbhaq bhaq nail ngaol. ² Aivq aqthel aqkav kav dai gul nail:

“Aqmil dov nail

Bhaqbhulloq meenq,

ga peiv gil-ail naol,

ga peiv gil-ail naol.

Meenq al meenq neq,

haqev nail neivq nail

jaol duq khi,

aqjiivq aqcavq pha q nail
 aqheel yaoq pha q
 yaoq-ao nee nail
 tsaog uvq duq
 pevq lal-a nail ngaol.

Aqjiivq aqcavq
 cavq deedee khi
 yu maq heldaiq nul nail
 keivq-avq iqsanl mail,
 a bhai jaol nail ngaol.

³ Khul khi mail dai
 ngal-aq neq,
 tsaol-aq iqsanl mail
 aivq nee mail
 khaqmiq sev nail dai
 jilpheed daol bol
 laivq-a nail ngaol.
 Miltsaq khe heeqphaq juq
 aivq nee mail bheed khi,
 miltsaq kovtavq-ai
 jaiqqaiq gaiq nail juq neq,
 meenq al meenq nail
 hulmeeq hulbhao bhao nail
 pha q bhai juq khi,
 hulmeeq hulbhao
 bhao lal-a nail ngaol” dai,
 ge nail ngaol.

⁴ A bhai nee ngal-aq, nqtavq kovtavq nee mail
 daoq yaoq daoq yaoq niailhai ge dov-ai leevq-
 a nail bhai, ngal ya gaiq-a nail ngaol. “Ngaq
 nail tsaol-aq juq-ol, aivq nail oeqbal nail haoqnao
 maq ya tsaohel-aivq dai maqkhaiq, aivq-i mail
 ya daq nail khoeq nail jio vq nail juq bhai maq ya

daq dai maqkhaiq, meenq al meenq nee dov lal yaoq. ⁵ Khul khi mail dai ngal-aq neq, aivq nail oeqbal neq, nqtavq kovtavq bha kev dai, jlav tuv-ai thaq nail ngaol. Aivq-i mail nl-a hal-a nail laiq nail tsa nail juq bhai, Miqyail maq nioilpeivq-ail.

⁶ Aivq yu bhai nl bhiq-a nail khe-ai, aivq bhai nl kovq bhiq yaoq. Aivq-i mail nl thaq hal thaq-ai thaq nail khe-ai, aivq bhai nvq bhoil nl kovq bhiq yaoq. Aivq-i mail kheq-ai thaq nail khaoqanq bhai, a bhai nee maqtsil nvq bhoil kheq khi aivq bhai bhi daol yaoq. ⁷ Aivq neq, aivq bhai aivq thaqeeq thaqheel khi, hulmeeq hulbhao bhao nail lavqkhoel nee neekhaol sil nail ngaol. A dai nail khoeq nail jiovg nail pha q khi noeqhaq noeqaoq nail pha q aivq nail kovtavq bhai bhi kev lee yaoq. Aivq nail neema lavqkhoel bhai niailhai ge thailthaiq nail ngaol: 'Ngal neq, heeqphaqma jiovg khi jaoldeel-nvq tha q nail ngaol. Ngal miqtsiq miqma maq ngel. Ngal haq nail aoq nail pha q bhai teevq thal-iq maq ya thaoqphuq-ail' dai, ge nail ngaol. ⁸ Alheel ngel-i mail, sil nail pha q, nioilkhaoq khaoq nail pha q, moevq nail sivq nail pha q, khoeq bhiq jiovg bhiq nail niil juq, teevq n nail lavqkhoel bhai taivq-ail aivq nail lavqkhoel bhai kev lee khi, miqjaq poiv ha nail bhai ya daq nail ngaol. Khul khi mail dai ngal-aq neq, aivq bhai yalkhaq dal nail Heeqphaq Miqyail neq, bhaqaoq eeq deede nail ngaol.

⁹ Meenq al meenq nee mail bheeq khi, hulmeeq hulbhao bhao nail lavqkhoel nee neekhaol sil nail miltsaq kovtavq khe heeqphaq juq neq, meenq al meenq bhai miqjaq poiv nail miqkhoiq

bhai ya moel-u phao, meenq al meenq nail haqbhoil nioilkhaoq khaoq nail ngaol. ¹⁰ Aqyu juq meenq al meenq-i mail ya daq thailthaiq nail khoeq nail jiovgq nail pha q bhai, geesil deedee nail ngel-i mail, eqyal bha thulphaol khi niailhai ge nail ngaol: 'Aqmil dov khi bhaqaoq mao-ail eeq nail Bhaqbhulloq meenq-ol, naol geeqlaoq aqdoil ya nail ngaol. Naqli teevq lavq lavqkhoel bhai taivq-ail naoq bhai yalkhaq dal nail pha q kev lee-aogq nial' dai, ge nail ngaol.

¹¹ Miltsaq kovtavq-ai jaiqqaiq gaiq nail juq iqsanl, meenq al meenq nail haqbhoil nioilkhaoq khaoq nail ngaol. Khul khi mail dai ngal-aq neq, teevq gaq-ail aqyu juq nail yalkav maq ul yaoq-aol. ¹² Yalkav al juq neq, phul, heel, sainl, laoqpav laolpav nail sainl, mao-ail meeq nail haqphal phal phul, nel nav nav nail haqphal, bhoiqkheel nail haqphal, neltsaiq deel haqphal, huqbhiq nil nail aqbhaol yaoq pha q yaoq-ao nee, yavmav nail aqjeel khi aqphoiq phoiq deedee nail aqbhaol-i mail lav sav-ai tha q nail yalkav, giqheel, hail khi lovmav-i mail lav sav-ai tha q nail nlmaoq iqsanl aol nail ngaol. ¹³ Tsaogqaoq laqphil, jaltsoiq bhai goe jaq nail pha q, tha oq nuv-ai tha q nail huqbhiq nil nail pha q, huqbhiq nil nail ulcuvq, huqbhiq nil nail ulcuvq aqheel, aqheeq tsilju nail ullul, aqtseel, khaqmul aqthail, gov, niaoqnel, yaol, moeqphaq lalaoq, yaqkav khi tsaol-aq nail yeel, niil juq ngaol.

¹⁴ Naol maivjeel jeel deedee lai nail aqheeq allu peivq gil-aogq nail ngaol. Naoq-i mail kheel deedee nail pha q khi meeq deedee nail yalkav

juq iqsanl, luq-ail seil-ail khi, naol yaqhao teevq thal-iq maq ya moel yaoq-aol.

¹⁵ Yalkav al juq gaoq khi ul khi, meenq al meenq bhaqda nee hulmeeq hulbhao bhao lal-a nail jaiqgaiq gaiq nail juq neq, meenq al meenq ya daq thailthaiq nail pha q bhai geesil deedee nail ngel-i mail, eqyal bha thulphaol thailthaiq nail ngaol. Agyu juq nioilkhaoq khaoq khaoq-ail niailhai ge nail ngaol:

¹⁶ 'Mao-ail meeq nail
haqphal phal phul,
nel nav nav nail haqphal khi,
neltsaiq deel haqphal dai khi,
heel, sainl khi,
laoqpav laolpav nail sainl
goe-nq tha q nail
aqmil dov nail meenq neq,
geeqlaoq aqdoil ya nail ngaol.

¹⁷ A dai mao nail
yalkav iqsanl mail,
naqli teevq lavq nail
lavqkhoel bhai taivq-ail
peiv gil ail-aoq nial laq' dai,
ge nail ngaol.

Laovq nail aqheel juq iqsanl, laovq bhai hel-dai q phail nail aqivq juq iqsanl, laovq lavqkhoel bhai ganl nl nail tsaol-aq iqsanl khi, iqyaq iqma lavqkhoel bhai jaiqgaiq gaiq nail tsaol-aq iqsanl mail, eqyal bha thulphaol-nvq tha q nail ngaol.

¹⁸ Agyu juq meenq al meenq poiv thailthaiq nail miqkhoiq bhai ya moel-u phao, 'Aqmil dov nail meenq thoil meenq khe-ai dul nail meenq khul meenq jiav nail-ai q' dai, gul deedee nail ngaol.

19 Aqyu juq yovqgavq bhai yovqgavq khaqlail
hoel dav hoel dav-ail nioilkhaoq khaoq-a nail
ngaol. Aqyu juq gul deede nail:

'Aqmil dov nail meenq neq,
geeqlaoq aqdoil ya nail ngaol.

Meenq al meenq nail
lavqkhoel bhai

yalkav jiav

deede nail ngel-i mail,

iqyaq iqma lavqkhoel bhai

tsao nail laovq juq nail

aqheel iqsanl mail

hulmeeq hulbhao

bhao lal-a nail ngaol.

Thailhai ngaol-aq,

naqli teevq lavq nail

lavqkhoel taivq-ail,

meenq al meenq

peiv ail-a nail ngaol' dai,

gul nail ngaol.

20 Nqtavq kovtavq bhai jaol nail juq-ol, meenq
al meenq peiv ail-a nail ngel-i mail, lavqkhiq tsail
yaoq. Miqyail nail tsaol-aq juq, gaqkhoel juq khi,
Miqyail nail haqbhoil gedan nail juq-ol, meenq al
meenq peiv ail-a nail ngel-i mail, nuljuq iqsanl
lavqkhiq tsail yaoq. Khul khi mail dai ngal-aq
neq, Nuljuq nail haqbhoil nl kovq bhiq nail dai
khi, Miqyail meenq al meenq bhai yalkhaq dal
bhiq-a nail ngaol" dai, ngal ya gaiq-a nail ngaol.

21 A bhai nee ngal-aq, gaq mao-ail kav nail
nqtavq gaqkhoel teevq gaq, lovmav heeq ma
teevq heeq bavq khi, iqyaq iqma bhai bav puvq
gai-aivq khi ge nail:

“Niailhai dul dai,
 aqmil dov nail
 Bhaqbhulloq meenq bhai
 maq ya moel yaoq-aol.
²² Dil-nvq deeq nail aqthel,
 daoqsel gul nail aqthel,
 bhaoqlao jiiv nail aqthel,
 nqbho jiiv nail aqthel,
 naoq nail lavqkhoel bhai
 maq ya gaiq yaoq-aol.
 Lavqmaoq nl nail tsaol-aq
 teevq gaq iqsanl,
 naoq nail lavqkhoel bhai
 maq jaol yaoq-aol.
 Gov thaoq nail aqthel iqsanl,
 naoq nail lavqkhoel bhai
 maq ya gaiq yaoq-aol.
²³ Phalmanq nail aqbhaq iqsanl,
 naoq nail lavqkhoel bhai
 maq bhaq yaoq-aol.
 Khaqma hevq nail,
 maol ail nail aqthel iqsanl,
 naoq nail lavqkhoel-ai
 maq ya gaiq yaoq-aol.
 Milnee uqnee
 naoq nail lavqkhoel bhai
 jaiqqaiq gaiq-a nail juq,
 miltsaq niil
 teevq heeq heeq lao bhai,
 eeq nail heel nail juq
 pevq nail ngaol.
 Naol neivq bhai
 laol bhiq sail bhiq-a nail

bhaqda nee,
jeq-e jaq-a iqsanl mail
laiq ail-a nail ngaol.

²⁴ Miqyail nail haqbhoil
gedan nail juq nail aqsivq,
Miqyail nail
tsaol-aq nail aqsivq dai khi,
miltsaq kovtavq-ai
heivq nail bhai ya daq-a nail
tsaol-aq iqsanl nail aqsivq,
naoq nail lavqkhoel bhai
ya moel-a nail ngaol” dai,
nqtavq gaqkhoel al gaq ge lavq-a nail ngaol.

19

*Nqtavq bhai jaol nail tsaol-aq munl munl ma
juq Miqyail bhai tsiqeeq nail ganl*

¹ A bhai nee ngal-aq, nqtavq nee mail tsaol-aq
munl munl ma nail aqthel khe-ai kav deede nail
aqthel bhai, ngal ya gaiq-a nail ngaol. Aqthel al
neq, niailhai gul nail ngaol:

“Haqlaiqlulyaq!
Hevqkovq nail phaqa,
seiqleiq khaoqsail
khi mail bhaqaog,
ngadao nail Miqyail
taivq-ail jia nail ngaol.

² Aivq yalkhaq dal nail neq,
maldil tsaq nail daol nail ngaol.
Eeq nail maimaqlal al gaq
yu nee mail khaqmiq sev khi
miltsaq yaq luq-ail

seil ail-a nail ngel-i mail,
 Miqyail aivq bhai
 yalkhaq dal bhiq-a nail ngaol.
 Al ovqtavq,
 sil-a nail aivq nail
 yaqkav juq nail haqbhoil
 Miqyail yaqmai-aq al gaq bhai
 nl kovq bhiq-a nail ngaol” dai,
 gul nail ngaol.

³ Aqyu juq gaoq gul nail:
 “Haqleiqululyaq!
 Meenq al meenq bhai
 miqjaq tovq thailthaiq nail
 miqkhoiq neq,
 nqmaq maqluv halyeel
 dav lai nail ngaol” dai,
 gul nail ngaol.

⁴ Aq-u phao, joiqmaoq mavmaoq nvq tsel
 liq gaq khi mail aqdoevq pha q al liq maol
 peevqceevq kovdoi q doi q nail lavqkhoel nee
 gaolbeiv khi, joiqjaq doiqbev bev ma bhai
 jaoldeel-nvq tha q nail Miqyail bhai uqhuq tha oq
 tha oq-ail:

“Aqmiq.
 Haqleiqululyaq” dai,
 gul-a nail ngaol.

⁵ A bhai nee ngal-aq, doiqbev bev ma nee
 aqthel meel dov-ai leevq nail bhai, ngal ya gaiq-a
 nail ngaol. Aqthel al neq,
 “Miqyail nail yaqkav pevq khi,
 Miqyail bhai ev nail
 eeq yaq nil yaq juq iqsanl-ol,
 ngadao nail Miqyail bhai

tsiqeeq bhel” dai,
ge nail ngaol.

⁶ Al ovqtavq, tsaol-aq munl munl ma nail aqthel khe-ai maqkhaiq, ulcuvq laoljaol nail aqthel khe-ai maqkhaiq, kav deedee nail nqjaiq jaiq nail aqthel khe-ai maqkhaiq, ngal ya gaiq-a nail ngaol. Aqthel al neq, niailhai gul nail ngaol: “Haqleiqlulyaq!

Iqsanl nail kovtavq bhai
uvthaiq nail bhaqaoq eeq nail
ngadao nail
Heeqphaq Miqyail neq,
joiqjaq nail heeqphaq
pevq lal-a nail ngaol.

⁷ Ngadao lavqkhiq
tsail deedee bhel.
Ngadao aivq bhai
tsiqeeq tsiqheel bhel.
Khul khi mail dai
ngal-aq neq,
Yaolyaq khaqma
hevq nail yanq
kev lee-aq nail ngaol.
Aivq bhai maol ail nail dai khi,
yaqmai-aq yaqnoil
aivq nail aqmaol aqmeeq-ai
lainq-ai thaq nail ngaol.

⁸ Yaqmai-aq al gaq bhai,
haoltaiv deel
haqphal phal phul
doi nail aqkhaoqanq
bivq-a nail ngaol.
Haqphal phal phul al neq,

Miqyail nail
 tsaol-aq juq-i mail
 nl-a hal-a nail
 tsaq nail daol nail
 phaqa ngaol" dai,
 ge nail ngaol.

⁹ A bhai nee ngal-aq, "Yaolyaq khaqma hevq nail bhai lal yaoq dai, bhi khul-a nail tsaol-aq neq, geeqlaoq eeq naol dai, gevq yaoq" dai, nqtavq gaqkhoel al gaq ngaq bhai ge lavq-a nail ngaol. "Daoq niil daoq neq, maldil tsaq nail Miqyail nee dov lee-a nail daoq ngaol" dai iqsanl, ge lavq-a nail ngaol.

¹⁰ Aq-u phao, ngal aivq bhai uqhuq thaoq nail dai khi, aivq nail aqkhill daoqthaoq bhai peevqceevq kovdoiq doiq-a nail ngaol. Thailhai ngaol-aq, aivq ngaq bhai ge lavq-a nail: "Thailhai thaqa khi. Naol khi naoq nail aqivq jaqbheq Yeiqsul nail salkhil khanq nail juq nee ngal iqsanl nuljuq khe-ai, Miqyail nail yaqkav ngaol. Miqyail bhai uqhuq thaoq yaoq. Khul khi nail dai ngal-aq neq, Yeiqsul nail ganl salkhil khanq nail phaqa neq, Miqyail nail haqbhoil gedan nail juq bhai Aqhaqlal Miqyail-i mail bhi ge-a nail phaqa pevq nail ngaol" dai, ge lavq-a nail ngaol.

Moeqphaqa aqphul jeeq-nq thaqa nail teevq gaqa nail ganl

¹¹ A bhai nee ngal-aq, nqtavq phao-ai thaqa nail bhai, ngal yaqa moel-a nail ngaol. A bhai moeqphaqa aqphul teevq maol jaol khi, al maol bhai jeeq-nq thaqa nail gaqa neq, saljial ivq khi tsaqa nail gaqa dai, khul nail ngaol. Aivq neq, tsaqa

nail daol nail lavqkhoel nee yalkhaq dal khi genl dev nail gaq ngaol. ¹² Aivq nail maivneev neq, miqjaq miqlail khe-ai dul nail ngaol. Aivq nail uqhuq bhai heel uqtsaoq maodai tsaq tsaq-nq thaq nail ngaol. Aivq teevq gaq taivq-ail heeq nia nail aqmil aivq nail kovtavq bhai teevq mil gevq-ai thaq nail ngaol. ¹³ Aivq aqsivq bhai he deev-a nail phailkhaq heelma teevq keiv doi-nq thaq nail ngaol. Aivq nail aqmil neq, Miqyail nail Daoq dai, mil-ai thaq nail ngaol.

¹⁴ Aq-u phao, nqtavq kovtavq khe genl dev nail munl munl ma juq moeqphaq aqphul jeeq khi, aivq nail haoqnao tsaother-aivq-a nail ngaol. Aqyu juq neq, haoltaiv deel haqphal phal phul doi-nq thaq nail ngaol. ¹⁵ Milkhaq juq nee genl dev nail dai khi, aivq nail moeqthaoq lavqkhoel nee, tav deede nail thaoma teevq keiv dov lal-a nail ngaol. Aivq aqyu juq bhai hail nail joiqniovq-i mail uvthaiq nail ngaol. Iqsanl nail kovtavq bhai uvthaiq nail bhaqoq eeq nail Miqyail nail neema phail deede nail aqheeq tsilju nail ullul naq dov duq bhai, aivq naq nail ngaol. ¹⁶ Aivq nail phailkhaq heelma bhai maqkhaiq, aqbhaq bhai maqkhaiq, aqmil niailhai gevq-ai thaq nail ngaol.

“Heeqphaq nail
kovtavq bhai heeqphaq,
uvthaiq nail
juq nail kovtavq bhai
uvthaiq nail gaq” dai,
gevq-ai thaq nail ngaol.

¹⁷ Aq-u phao, nlma bhai nqtavq gaqkhoel teevq gaq thulphaol-nvq thaq nail bhai, ngal ya moel-a nail ngaol. Nqtavq bhai bhail nail keivq-avq juq bhai aivq mailma-ail gul bhiq-a nail: “Lal yaoq. Jaq tavq daol tavq nail haqbhoil Miqyail-i mail lav sav-ai thaq nail aqduq bhai jil lal yaoq. ¹⁸ Heeqphaq juq nail haqjoil, genl dev nail munl munl ma bhai heldaiq nail aqivq juq nail haqjoil, gaq mao-ail kav nail tsaol-aq juq nail haqjoil, moeqphaq khi mail al nail kovtavq bhai jeeq-nq thaq nail tsaol-aq juq nail haqjoil, yaqkav khi yaqkav maq ngel nail juq nail haqjoil, eeq yaq nil yaq juq iqsanl nail haqjoil jaq lal yaoq” dai, gul bhiq-a nail ngaol.

¹⁹ Aq-u phao, haqev nail jaiqyaq al maol neq, miltsaq bhai uvthaiq nail heeqphaq juq khi mail aivq nail genl dev nail munl munl ma juq nee mail moeqphaq jeeq-nq thaq nail gaq khi mail aivq nail genl dev nail munl munl ma juq bhai genl dev nail dai khi, jil lai nail bhai, ngal ya moel-a nail ngaol. ²⁰ Thailhai ngaol-aq, haqev nail jaiqyaq al maol bhai nieivq khi, Miqyail nail haqbhoil gedan naol dai ge khi ngaol-aq, maldil maq ngel nail gaq bhai iqsanl, aivq nee mail teevq gaq khe-ai nieivq-a nail ngaol. Tsaol-aq al gaq neq, haqev nail jaiqyaq al maol nail junq deeq-ai thaq khi, al maol nail maolkhoel bhai uqhuq thaoq nail tsaol-aq bhai hevq bheel-aivq dai, haqev nail jaiqyaq al maol nail aqmil bhai juq khi bhi heeq bhiq moel nail juq nl daiq bhiq-a nail al gaq ngaol. Aqyu nvq gaq bhai miqjaq tovq nail miqjal jalheel nail ngaqkha bhai bavq puvq bhiq-a nail ngaol. ²¹ A bhai nee ngal-aq,

moeqphaq jeeq-nq thaq nail gaq nail moeqthaoq nee dov lee-a nail thaoma-i mail jail-ail ceevq-a nail tsaol-aq juq bhai iqsanl, heivq gil-a nail ngaol. Aq-u phao, keivq-avq iqsanl mail, aqyu juq nail haqjoil teevq bov ya jaq-a nail ngaol.

20

Teevq hinl kovq uvthaiq nail ganl

¹ A bhai nee ngal-aq, nqtavq gaqkhoel teevq gaq nqtavq kovtavq nee yavq kha lee nail bhai, ngal ya moel-a nail ngaol. Aivq neq, mao-ail navq nail khaqduq nail taovq taovqphoil khi mail hailcav deeq ma, oil-nq thaq nail ngaol.

² Nqtavq gaqkhoel al gaq, neivq heeqphaq khi mail neivq Saqdaq dai khul nail baivyaovq al maol bhai nieivq khi, teevq hinl kovq bhee dai khil cuvq lavq cuvq cuvq khi, pheethaiq-ai thaq nail ngaol. (Baivyaovq al maol neq, aq-u khe haqev nail eellel al maol ngaol.) ³ Teevq hinl kovq maq bhee lal-a nail gaiqlaq bhai, aivq jeq-e jaq-a juq bhai jalmul maq ya mul ya nia-ail dai, mao-ail navq nail khaqduq al duq nail lavqkhoel nqtavq gaqkhoel al gaq aivq bhai bavq bhoel khi, taovq taovq thaiq khi mail, al nail kovtavq bhai junq deeq-ai thaq nail ngaol. Teevq hinl kovq bhee lal haq neq, teevq yanq taivq-ail aivq bhai phaiq dov bhiq nail ngaol.

⁴ Aq-u phao, ngal doiqbev bev ma juq bhai ya moel-a nail ngaol. Doiqbev bev ma al juq bhai jaoldeel-nvq thaq nail tsaol-aq juq neq, yalkhaq dal nail aqkhaoqanq ya-a nail ngaol. Yeiqsul nail ganl salkhil khanq nail nee ovqtavq, Miqyail nail

daoq cavq nail bhaqda nee, uqhuq bhi tsilceiv nail bhai ya daq-a nail tsaol-aq juq nail aqhaqlal bhai iqsanl, ngal ya moel-a nail ngaol. Aqyu juq neq, haqev nail jaiqyaq al maol bhai maqkhaiq, maolkhoel bhai maqkhaiq, uqhuq maq thaoq-al. Al ovqtavq, yovqgavq nail neeqthel bhai maqkhaiq, yovqgavq nail aqlavq bhai maqkhaiq, haqev nail jaiqyaq al maol nail junq maq deeq-ai thaq-al. Aqyu juq gaoq doevq kovq lal khi, Khali nee mail teevq hinl kovq bhee dai, uvthaiq-a nail ngaol. ⁵ Jail nail sil-a nail tsaol-aq yaoq juq yaoq neq, teevq hinl kovq maq bhee lal-u neq, maq doevq kovq lal-ail. Niil neq, iqmoeq ilmoeq khe gaoq doevq kovq lal-a nail pov ngaol. ⁶ Iqmoeq ilmoeq khe pov doevq kovq lal-a nail bhai aol lai-a nail tsaol-aq juq neq, geeqlaoq eeq deede khi, meeq nail haol nail tsaol-aq ngaol. Nvq pov teevq pov sil nail pha, aqyu juq nail kovtavq bhai bhaqaoq maq jia yaoq-aol. Aqyu juq neq, Miqyail khi mail Khali nail Philma pevq khi, Khali nee mail teevq hinl kovq bhee dai, ya uvthaiq nail ngaol.

Neivq Saqdaq bhai ga lai-a nail ganl

⁷ Teevq hinl kovq bhee lal haq neq, thaonq nee mail neivq Saqdaq bhai phaiq dov bhiq nail ngaol. ⁸ Aivq dov ail khi milma liq phaoq liq khoel bhai jaol nail jeq-e jaq-a juq bhai hevq bheel-aivq khi genl dev nail haqbhoil bhi jil lal nail ngaol. Jeq-e jaq-a al juq bhai, Gaolgav khi mail Maqgaolgav dai khul nail ngaol. Aqyu juq neq, iqyaq iqma khe tsalhail khe-ai mao nail ngaol. ⁹ Aqyu juq miltsaq kovtavq bhai jaol bhee

gil khi, Miqyail nail tsaol-aq juq nail naq duq khi mail Miqyail mailma-ail gaiq-a nail meenq bhai ga jaoq-ai thaq nail ngaol. Thailhai ngaol-aog, nqtavq nee miqjaq ga lee khi, aqyu juq bhai poiv jaq gil-a nail ngaol. ¹⁰ Al ovqtavq, aqyu juq bhai hevq bheel-aivq-a nail neivq Heeqphaq bhai iqsanl miqjaq khi mail miqjal jalheel nail ngaqkha bhai bavq puvq nail ngaol. Ngaqkha al nail lavqkhoel haqev nail jaiqyaq al maol khi mail Miqyail nail haqbhoil gedan naol dai, ge khi ngaol-aog, maldil maq ngel nail al gaq aol nail ngaol. Aqyu juq neq, nqmaq maqluv halyeel, nqkiv n-gaol maqkhaiq, khoeq nail jiovc nail bhai ya daq nail ngaol.

Phulleq deel doiqbev bev ma nail svtavq bhai yalkhaq dal nail ganl

¹¹ A bhai nee ngal-aq, phulleq deel joiqjaq doiqbev bev ma khi a bhai jaoldeel-nvc thaq nail gaq bhai, ngal ya moel-a nail ngaol. Nqtavq khi miltsaq aivq nail svtavq nee peivq-ail khi, teevq thal-iq maq ya moel dai, peiv ail-a nail ngaol. ¹² Sil-a nail eeq yaq nil yaq iqsanl mail, doiqbev bev ma al nail svtavq bhai thulphaol-nvc thaq nail bhai, ngal ya moel-a nail ngaol. Aq-u phao, haoqgavq juq phao-ai thaq nail ngaol. Aqdoevq bhi doevq nail haoqgavq phaldoiq iqsanl phao-ai thaq nail ngaol. Sil-a nail tsaol-aq juq-i mail nl-a hal-a nail juq, haoqgavq al juq nail lavqkhoel bhai gevq bhoel-ai thaq nail khe-ai, gevq bhoel-ai thaq nail al juq bhai heldaiq heldaiq-ail, aqyu juq bhai yalkhaq dal bhiq nail ngaol. ¹³ Iqyaq iqma neq, aivq nail lavqkhoel sil-ai thaq nail tsaol-aq

juq bhai Miqyail nail aqlavq lavqkhoel bhai av bhiq nail ngaol. Sil nail pha q khi mail sil nail milkhaoq iqsanl, aqyu juq nail lavqkhoel bhai sil-ai tha q nail tsaol-aq juq bhai Miqyail nail aqlavq lavqkhoel bhai av bhiq nail ngaol. Tsaol-aq ya q yaoq ga q yaoq-ao nee mail, yovqgavq-i mail khal nl khal hal-a nail khe-ai, yalkha q dal lavq nail bhai ya da q nail ngaol. ¹⁴ Aq-u phao, Miqyail sil nail pha q bhai ma qkhai q sil nail milkhaoq bhai ma qkhai q, miqja q nail nga qkha bhai bavq puvq nail ngaol. Miqja q nail nga qkha al kha ne q, nvq pov teevq pov sil nail pha q pevq nail ngaol. ¹⁵ Aqdoevq bhi doevq nail hao qgavq phaldoiq lavqkhoel bhai aqmil gevq bhoel-ai tha q nail tsaol-aq iqsanl bhai, miqja q nail nga qkha bhai, bavq puvq nail ngaol.

21

Nqtavq aqsivq khi miltsaq aqsivq nail ganl

¹ Aq-u phao, ngal nqtavq aqsivq khi miltsaq aqsivq bhai ya moel-a nail ngaol. Khul khi mail dai ngal-aq neq, nqtavq aqlil khi miltsaq aqlil neq, peiv ail-aq nail ngaol. Iqya q iqma iqsanl, ma q jiav yaoq-aol. ² Aq-u phao, meeq nail haol nail Yeiglulsaqlai q meenq aqsivq Miqyail jaol nail nqtavq kovtavq nee yavq kha lee thailthai q nail bhai, ngal ya moel-a nail ngaol. Meenq al meenq neq, maol ail nail yaqmai-aq yaqnoil khe-ai, aqmeeq-ai lainq-ai tha q nail ngaol. ³ Doiqbev bev ma nee mail, kav deede nee nail aqthel gul dov-ai leevq nail bhai, ngal ya gaiq-a nail ngaol. Aqthel al neq, niailhai gul nail ngaol: "Heldai q

dei-eiq. Miqyail nail jaol duq tsaol-aq jaol nail bha jiav lee khi, aivq tsaol-aq yaq nee mail jaol nail ngaol. Aqyu juq neq, Miqyail nail tsaol-aq pevq khi, Miqyail iqsanl, aqyu juq nee mail jaol nail ngaol. ⁴ Aivq aqyu juq nail maivbhil iqsanl mail siv bhiq nail ngaol. Sil nail phaqaq maq jiav yaoq-aol. Noeqhaq nail phaqaq, nioilkhaoq khaoq nail phaqaq, nal nail goel nail phaqaq, niil juq iqsanl maq jiav yaoq-aol. Khul khi mail dai ngal-aq neq, iqmoeq-u phao jiav-a nail juq peivq gil ail-aq nail ngaol” dai, ge nail ngaol.

⁵ Doiqbev bev ma bhai jaoldeel-nvq thaqaq nail gaqaq ge nail: “Heldaiq. Ngalaq yaoqaq phaqaq yaoqaq-aol nee aqsivq lav phal-aq nail ngaol” dai, ge nail ngaol. Aivq teevq pov gaqaq ge nail: “Niil juq gevq thaqaq-ai yaoqaq. Khul khi mail dai ngal-aq neq, daoqaq niil juq neq, maldil tsaqaq khi saljial ivq nail daoqaq pevq nail ngaol” dai, ge nail ngaol.

⁶ Al ovqtavq, aivq teevq pov gaqaq ge nail: “Gilaq-aol naol. Ngalaq neq, Aqlaqphal khi Aolmeiqgal ngaol. Iqmoeq ilmoeq khi haoqnao naosaqaq khe gaqaq iqsanl pevq nail ngaol. Ulcuvq khal moevq nail tsaol-aq bhai, aqdoevq bhi doevq lal nail ulcuvq eelbev nee dov lee-a nail ulcuvq ngalaq aqnieivq-ail bhi daol naol. ⁷ Gaqaq lai-a nail tsaol-aq jaiqbhoil niil juq ya nail ngaol. Ngalaq aivq nail Miqyail pevq khi, aivq ngaqaq nail yaqaq pevq nail ngaol. ⁸ Thailhai ngaol-aq, geesil nail neema aol nail tsaol-aq, neema maqaq thaqaqtsaol nail tsaol-aq, aqjiivq aqcavq phaqaq nl nail tsaol-aq, tsaol-aq bhai heivq-a nail tsaol-aq, khaqmiq sev nail tsaol-aq, neivq bhai laol nail sail nail tsaol-aq, thaqaqphaoqaq aqma maolkhoel bhai uqhuqaq thaqaq

nail tsaol-aq khi, goiqbhaog bhaog nail tsaol-aq iqsanl mail, miqjaq khi miqjal jalheel tovq nail ngaqkha bhai ya daq nail ngaol. Al neq, nvq pov teevq pov sil nail phaog pevq nail ngaol” dai, ngaq bhai ge lavq-a nail ngaol.

Yeiglulsaqlaiq meenq aqsivq nail ganl

⁹ Aq-u phao, haoqnao naosag khe khoeq nail jiovgq nail sivq phaog teevq bhee aol nail, iqloagq sivq heeq tsiq-nq thaog nail nqtavq gaqkhoel sivq gaq nail lavqkhoel khe teevq gaq lee khi: “Lal yaoq. Yaolyaq nail khaqma pevq nail yaqmai-aq yaqnoil ngal naog bhai cavq naq lavq bhel” dai, ngaq bhai ge lavq-a nail ngaol. ¹⁰ Aivq ngaq bhai Aqhaqlal Miqyail nail lavqkhoel nee eeq dee moe deede nail gaoqjaog bhai hel-aivq lavq-a nail ngaol. Aq-u phao, Miqyail jaol nail nqtavq kovtavq nee yavq kha lee thailthaiq nail meeq nail haol nail Yeiglulsaqlaiq meenq, ngaq bhai cavq naq lavq-a nail ngaol. ¹¹ Meenq al meenq neq, Miqyail nail seiqlaiq khaoqsail teevq bhee aol nail ngaol. Meenq al meenq nail aqbhaq bhaq nail neq, aqphoiq phoiq deede nail sainl khe-ai pevq khi, phaoq daiq khe-ai aqbhaq mee nia phaog aol nail neltsaiq deel sainl khe-ai iqsanl, dul nail ngaol. ¹² Meenq al meenq neq, eeq dee moe deede nail khainl jiav khi, govkhoiq tsel-nvq khoiq daol nail ngaol. Govkhoiq al tsel-nvq khoiq bhai, nqtavq gaqkhoel teevq khoiq bhai teevq gaq lovq nail ngaol. Lolgov bhai neq, llsaqlaiqlal nail jeq-e tsel-nvq jeq-e nail aqmil gevq-ai thaog nail ngaol. ¹³ Govkhoiq al juq neq, nlma dovkhoeq phao hail khoeq, pultavq phao

hail khoeq, pul-nvq phao hail khoeq khi, nlma ga khoeq phao hail khoeq daol nail ngaol. ¹⁴ Khainl al bhai, iqmoeq ilmoeq kaovq-a nail lovmav tsel-nvq heeq jiav nail ngaol. Lovmav al juq bhai Yaolyaq nail gaqkhoel tsel-nvq gaq nail aqmil gevq-ai thaq nail ngaol.

¹⁵ Ngaq bhai daoq ge tsaoq lavq-a nail nqtavq gaqkhoel al gaq, meenq bhai maqkhaiq, khainl bhai maqkhaiq, khainl nail lolgov juq bhai maqkhaiq, tsa daiq nail haqbhoil heel nail lunl aqkhaoq aol nail ngaol. ¹⁶ Meenq al meenq neq, liq phaoq liq khoel ngaol. Nqtavq gaqkhoel al gaq, heel nail lunl aqkhaoq al-i mail meenq al meenq bhai tsa daiq-u phao, teevq hinl liq yal lal bhee nail ngaol. Heelma phao, laiqma phao, daqmoe phao iqsanl teevq gaq kheel ngaol. ¹⁷ A bhai nee ngal-aq, aivq khainl bhai tsa daiq-u phao, tsaol-aq nail lavqcav nee saol-nvq haq neq, teevq yal liq tsel liq cav moe nail ngaol. Tsaol-aq nail lavqcav khi nqtavq gaqkhoel nail lavqcav neq, teevq gaq kheel ngaol.

¹⁸ Meenq al meenq nail khainl neq, neltsaiq deel sainl-i mail kaovq-ai thaq nail ngaol. Meenq neq, haoltaiv deel heel-i mail kaovq-ai thaq khi, phaoqdaiq khe-ai haoltaiv deel ngaol. ¹⁹ Meenq nail khainl daoqthaoq bhai kaovq-ai thaq nail lovmav al juq neq, aqphoiq mao-ail phoiq nail sainl mee nia pha-q-i mail kaovq-ai thaq nail ngaol. Iqmoeq ilmoeq khe heeq neq, neltsaiq deel sainl ngaol. Nvq heeq teevq heeq neq, aqpheel pheel nail sainl ngaol. Hail heeq teevq heeq neq, phulleq deel sainl ngaol. Liq heeq teevq heeq neq, aqniul niul nav nav nail sainl

ngaol. ²⁰ Ngaq heeq teevq heeq neq, gevq lavq yaovq deel nail sainl ngaol. Kovq heeq teevq heeq neq, aqnel nel deel sainl ngaol. Sivq heeq teevq heeq neq, aqheel heel nel nel nail sainl ngaol. Eivq heeq teevq heeq neq, aqniul niul heel heel nail sainl ngaol. Goiq heeq teevq heeq neq, heel tsaiq deel nail sainl ngaol. Tsel heeq teevq heeq neq, aqheel heel niul niul nail sainl ngaol. Tsel teevq heeq teevq heeq neq, aqnel bhai boivq boivq kheq nail sainl ngaol. Tsel-nvq heeq teevq heeq neq, aqnel bhai aqpheel kheq nail sainl ngaol. ²¹ Khainl lolgov tsel-nvq gov neq, laoq pav laol pav nail sainl tsel-nvq heeq-i mail lav sav-ai thaq nail ngaol. Lolgov teevq gov bhai neq, laoqpav laolpav nail sainl teevq heeq ngaol. Meenq al meenq nail gaoltsi bhai daol nail gailkhaol neq, haoltaiv deel heel-i mail lav sav-ai thaq khi phaoqdaiq khe-ai haol nail ngaol.

²² Meenq al meenq nail lavqkhoel-ai uqhuq thaog nail ilkhaol il ma jiav nail bhai, ngal maq moel-al. Khul khi mail dai ngal-aq neq, iqsanl nail kovtavq bhai uvthaiq nail bhaqaoq eeq nail Heeqphaq Miqyail khi Yaolyaq neq, meenq al meenq nail uqhuq thaog nail ilkhaol il ma pevq nail ngaol. ²³ Meenq al meenq nail lavqkhoel bhai nlma nail aqbhaq khi bhala nail aqbhaq maq loq-ail. Khul khi mail dai ngal-aq neq, Miqyail nail seiqlaiq khaoqsail meenq al meenq bhai aqbhaq bhaq khi, Yaolyaq neq, meenq al meenq nail phalmanq pevq nail ngaol. ²⁴ Jeq-e jaq-a iqsanl mail aqbhaq al nail lavqkhoel bhai tsao nail ngaol. Miltsaq khe heeqphaq juq, meenq nail lavqkhoel bhai yovqgavq nail

seiqleiq khaoqsail yovqgavq oil lavq nail ngaol.
²⁵ Meenq al meenq nail khainl logov juq neq, teevq n n lao-ail maq pheethaiq-ail. Al ovqtavq, a bhai neq, nqkivq maq kivq lai-ail. ²⁶ Jeq-e jaq-a iqsanl nail seiqleiq khaoqsail khi aqyu juq nail aqphoiq kav nail pha, aqyu juq meenq al meenq nail lavqkhoel bhai oil lavq nail ngaol.
²⁷ Aqjiivq aqcavq khul pha maqkhaiq, meenq al meenq bhai maq ya oil bhoel laivq-ail. Aqjiivq aqcavq pha nl-a nail tsaol-aq khi goiqbhaoq bhaoq-a nail tsaol-aq khul gaq maqkhaiq, meenq al meenq bhai maq ya aol lai-ail. Yaolyaq nail aqdoevq bhi doevq nail haoqgavq phaldoiq lavqkhoel bhai aqmil gevq bhoel-ai thaq nail tsaol-aq taivq-ail, ya aol lai nail ngaol.

22

¹ A bhai nee ngal-aq, nqtavq gaqkhoel al gaq, aqdoevq bhi doevq nail laoljaol ngaq bhai cavq naq lavq-a nail ngaol. Miqyail khi Yaolyaq nail joiqjaq doiqbev nee il dov lee khi, sainl khe-ai dul nail haoltaiv deel laoljaol pevq nail ngaol.
² Laoljaol al jaol neq, meenq nail gailkhaol gaoltsi nvq pav-ail il khal leevq thaq nail ngaol. Laoljaol al jaol nail nvq phao bal-nvq, nvq phao bal-nvq-ail, aqdoevq bhi doevq nail aqbhaol doevq nail ngaol. Aqheeq aqbhaol al bhaol neq, aqheeq tsel-nvq pha heeq khi, bhala yaoq heeq yaoq-ao nee aqheeq heeq lee nail ngaol. Aivq nail aqpavq juq neq, jeq-e jaq-a iqsanl nail nalgoel bhai meeq lai nail haqbhoil ngaol. ³ Niaie nee pultavq neq, khul pha maqkhaiq iqkhail yavq nail bhai maq ya daq yaoq-aol. Meenq al meenq bhai Miqyail

khi Yaolyaq nail joiqjaq doiqbев bev ma jiaв khi, aivq nail yaqkav juq aivq bhai uqhuq thaoq nail ngaol. ⁴ Aqyu juq aivq nail maivphaoq bhai ya moel khi, aqyu juq nail neeqthel bhai aivq nail aqmil gevq-ai thaq nail ngaol. ⁵ Niai nee pultavq neq, nqkivq maq kivq-ail yaoq-aol. Phalmanq nail aqbhaq maqkhaiq, nlma nail aqbhaq maqkhaiq, aqyu juq maq loq yaoq-aol. Khul khi mail dai ngal-aq neq, Heeqphaq Miqyail aqyu juq bhai aqbhaq bhaq bhiq nail ngaol. Aqyu juq neq, nqmaq maqluv halyeel ya uvthaiq nail ngaol. ⁶ A bhai nee ngal-aq, nqtavq gaqkhoel al gaq teevq pov gaoq ge nail: “Daoq niil juq neq, maldil tsaq khi saljial ivq nail daoq ngaol. Miqyail nail haqbhoil gedan nail juq bhai Aqhaqlal Miqyail bivq-a nail Heeqphaq Miqyail neq, mao-ail maq maoq lal mail pevq lal nail juq aivq nail yaqkav juq bhai phaodaiq bhiq nail dai khi, aivq nail nqtavq gaqkhoel bhai khoel-ai leevq-a nail ngaol” dai, ge bhiq-a nail ngaol.

Yeiqsul lavqtsail mail yavq kha lee nail ganl

⁷ “Ngal lavqtsail mail yavq kha lee naol dei-eiq. Haoqgavq niil nail lavqkhoel bhai gevq-ai thaq nail Miqyail nail daoq bhai naldaiq nail tsaol-aq, geeqlaoq eeq nail ngaol” dai, Yeiqsul ngaq bhai ge lavq-a nail ngaol.

⁸ Ngal neq, Yaolhaq ngaol. Ngal ganl niil juq iqsanl bhai ya gaiq ya moel-a nail ngaol. Ganl niil juq bhai ya gaiq ya moel gaq-u phao, ngaq bhai cavq naq lavq-a nail nqtavq gaqkhoel al gaq bhai uqhuq thaoq nail dai khi, aivq nail aqkhill daoqthaoq bhai peevqceevq kovdoiq

doiq-a nail ngaol. ⁹ Thailhai ngaol-aoq, aivq ge nail: “Thailhai thaq khi. Ngal iqsanl, naoq-ai kheel Miqyail nail yaqkav ngaol. Naoq nail aqivq jaqbheq pevq nail, Miqyail nail haqbhoil gedan nail juq nee maqkhaiq, haoqgavq niil keiv nail lavqkhoel bhai gevq-ai thaq nail daoq juq bhai naldaiq nail tsaol-aq juq iqsanl nee maqkhaiq, ngal iqsanl aqyu juq kheel yaqkav ngaol. Miqyail bhai taivq-ail uqhuq thaog yaoq” dai, ngaq bhai ge lavq-a nail ngaol.

¹⁰ A bhai nee ngal-aq, aivq ngaq bhai gaoq ge lavq-a nail: “Haoqgavq nail lavqkhoel bhai gevq-ai thaq nail Miqyail nail daoq bhai junq thaq deeq. Khul khi mail dai ngal-aq neq, aqyanq kev lee-aiq nail ngaol. ¹¹ Hageiv nail pha q nl nail tsaol-aq hageiv nail pha q nl dal laivq khi, aqjiivq aqcavq pha q nl nail tsaol-aq iqsanl aqjiivq aqcavq pha q nl dal laivq naol. Tsaq nail daol nail pha q nl nail tsaol-aq tsaq nail daol nail pha q nl dal laivq khi, meeq nail haol nail tsaol-aq juq iqmoeq phao aqmeeq aqhaol haol dai doevq dal laivq nail ngaol” dai, ge lavq-a nail ngaol.

¹² Yeiqsul ge nail: “Ngal lavqtsail mail yavq kha lee naol dei-eiq. Tsaol-aq yaoq gaq yaoq-ao nee bhai, yovqgavq-i mail khal nl khal hal-a nail khe-ai geel-nvq dai bivq nail dai khi, ngal kovpavq oil leevq naol. ¹³ Ngal neq, Aqlaqphal khi Aolmeiqgal ngaol. Iqmoeq ilmoeq khe khi haoqnao naosaq khe gaq iqsanl ngel naol. Iqmoeq ilmoeq iqsanl, haoqnao naosaq khe iqsanl pevq nail ngaol.

¹⁴ Yovqgavq nail aqgaq aqdoi bhai tsiq haol-a nail tsaol-aq, geeqlaoq ee q nail ngaol. Aqyu

juq neq, aqdoevq bhi doevq nail aqbhaol al nail aqheeq ya jaq dai maqkhaiq, meenq nail lolgov lavqkhoel nee aol lal nail aqkhaoqanq ya-a nail ngaol. ¹⁵ Thailhai ngaol-aol, meenq nail lavqniil phao neq, khee q khe-ai dul nail tsaol-aq, neivq bhai laol nail sail nail tsaol-aq, khaqmiq sev nail tsaol-aq, tsaol-aq bhai lav heivq-a nail tsaol-aq, thaoqphaoq aqma maolkhoel bhai uqhuq thaoq-a nail tsaol-aq khi, goiqbhaolq bhaolq nail tsaol-aq juq jaol nail ngaol.

¹⁶ Ngal neq, Yeiqsul ngaol. Khali yaq munl juq bhai, ganl niil salkhil bhi khanq bhiq nail dai khi, ngal ngaq nail nqtavq gaqkhoel bhai khoel-ai leevq-a nail ngaol. Ngal neq, Daqbhil nail jeq-e jaq-a ngaol. Nqhao khe aqbhaq bhaq deede neil aqgil iqsanl ngel naol" dai, ge lavq-a nail ngaol.

¹⁷ Aqhaqlal Miqyail khi, maol ail nail dai, lainq-ai tha q nail yaqmai-aq al gaq, "Lal yaoq" dai, khul nail ngaol. Khal ya gaiq-a nail tsaol-aq juq iqsanl mail "Lal yaoq" dai, khul nail ngaol. Ulcuvq khal moevq nail tsaol-aq lal yaoq. Khal daol movq nail tsaol-aq juq aqdoevq bhi doevq nail ulcuvq aqnieivq-ail daol lal yaoq.

¹⁸ Haoqgavq niil keiv nail lavqkhoel Miqyail nail haqbhoil gedan-ai tha q nail daoq niil juq bhai ya gaiq-a nail yaoq gaq yaoq-ao nee bhai, ngal daoq niailhai bivq nail ngaol. Tsaol-aq teevq gaq ganav haoqgavq niil nail lavqkhoel khe gevq-ai tha q nail juq bhai gaoq gevq laolq haq neq, haoqgavq niil nail lavqkhoel bhai gevq-ai tha q nail khoeq nail jiovq nail niil juq Miqyail aivq bhai bhi daq nail ngaol. ¹⁹ Tsaol-aq teevq gaq ganav haoqgavq niil keiv nail lavqkhoel

Miqyail nail haqbhoil gedan-ai thaq nail daoq niil juq bhai oil ha haq neq, haoqgavq niil nail lavqkhoel bhai gevq-ai thaq nail aqdoevq bhi doevq nail aqbhaol nail aqheeq khi meeq nail haol nail meenq lavqkhoel khe aivq ya heeq phaqaail tsaq nail juq bhai, Miqyail oil ha nail ngaol.

²⁰ “Ngal maldil lavqtsail mail yavq kha lee naol” dai, ganl niil salkhil khanq nail gaq ge nail ngaol. Ngel naol. Heeqphaq Yeiqsul-ol, yavq kha lee yaoq.

²¹ Heeqphaq Yeiqsul nail geeqlaoq eeljaol nuljuq iqsanl nail kovtavq bhai bhi jiav dei-eiq.

Jalliq aqsivq Gaolkheel daoq
Akeu: Jalliq aqsivq Gaolkheel daoq New Testament
copyright © 2015 Wycliffe Bible Translators, Inc.

Language: Gaolkheel (Akeu)

Contributor: Wycliffe Bible Translators, Inc.

All rights reserved.

2020-11-13

PDF generated using Haiola and XeLaTeX on 21 Feb 2024 from source
files dated 29 Jan 2022
aaaba9fd-8172-55cc-ad15-906f43ddb5a5